



La Géorgie  
 Indépendante  
 Revue mensuelle  
 A O U T  
 1929—№ 44

ავგოსტო  
 1929 წ.  
 № 44

# დავით აღმაშენებლის სახელობის ლიტერატურული კვლევის ჟურნალი

ს ა ქ ა რ თ ვ ე ლ ო ს პ ო ლ ი ტ ი კ უ რ ი პ ა რ ტ ი ე მ ი ს ო რ გ ა ნ ო .

## შ ი ნ ა რ ს ი :

მეთაური—ავთომყოფი რუსეთი.  
 —ლი—საქართველო ციფრებით.  
 ა. მულგინი—უკრაინის საკითხი.  
 ს. შავიშვილი—ლტოლვილთა პრობლემა.  
 გუშაგვი—«კავკასიონი» (წიგნი პირვ. და მეორე)

ბარბიუსი დალატობს ჩაგრულთა საქმეს.  
 29 ავგოსტო.  
 საქართველოს საკითხი.  
 რას სწერენ ბლოშევიკებზე.  
 ია—კომპარტიის მე-6 ყრილობა. და სხ.

## ა ვ ა თ მ ყ ო ზ ი რ უ ს ე თ ი

გასულ საუკუნის მიწურულში და მიმდინარეს დასაწყისში არსებობდა ერთი ავთომყოფი ქვეყანა—ოსმალეთი აბდულ ჰამიდისა. დღეს არსებობს მეორე ავთომყოფი ქვეყანა—რუსეთი სოსო ჯულაშვილისა. აბდულ ჰამიდს, მის ქვეშევრდომთა სისხლში ბანაობისათვის, წითელი სულთანი დაერქვა მეტსახელად. სოსო ჯულაშვილი არ ატარებს ასეთ მყვირალა სახელს, თუმცა სტალინმა ბევრათ გადააქარბა წითელ სულთანს სწორეთ ამ ხელობაში.

ჩვენ არ გვინდა განვავარძოთ ეს შედარება, მით უფრო, რომ ძველ ოსმალეთსა და დღევანდელ რუსეთს შორის, რამდენათ მათ შინაგან სტრუქტურას ვეხებით, განსხვავება უფრო დიდია, ვინემ მზგავსება.

შესადარებელია მხოლოდ ის აღმაცური, აგდებული მოპყრობა, რომელსაც უცხო ქვეყნები რუსეთის მიმართ იჩენენ. მართლაც, მეტათ დასწეულებული და დაძაბუნებული უნდა იყოს უკანასკნელი, რომ ის მოსვლოდა, რაც მოუვიდა... ჩინეთისგან!

ვინ იფიქრებდა ამ თორმეტი წლის წინეთ, რომ რუსეთის მაღალ მოხელეთ ასე ადვილთ აუკრავდენ ბარგს მანჯურიიდან, ან კიდევ, რუსეთის საზინთ აშენებულ ჩინეთ-აღმოსავლეთის რკინის-გზას ასე უბოდიშოთ დაეპატრონებოდენ? არავინ, რა თქმა უნდა, მაგრამ დღეს ეს ხალასი სინამდვილეთა და არც არავის უკვირს!

არ უკვირთ, პირველ ყოვლისა, თვით კრემლის ჯიელებს, მიუხედავთ მათი «საზოგადოებრივობის» დიდი აღშფოთებისა და რეზოლიუციებისა. ჩინეთის მთავრობას ჰგონია, რომ ასეთი მოქმედება მას დაუსჯელათ ჩაუვლისთ—ამბობს ყარახანი ერთ თავის ნოტაში. სრული სიმართლეთა, ჩინეთს რომ სხვანაირათ ჰგონებოდა, ასე არ მოიქცეოდა,—და ამაშია სწორეთ მოსკოვის ტრადიში. სახელმწიფოს ღირსე-

ბისა და უფლებების დასაცავთ სულაც არაა ხშირათ საჭირო ომი და დავიდარება, საკმარისთა საერთაშორისო პრესტიჟი და პატივისცემა. მოსკოვს არ მოუპოვება არც ერთი, არც მეორე, ხოლო მანჯურიის ისტორიამ ხომ მთლათ ფარდა ახადა ამ ავღებას და ამ უძღურებას.

უძღურების მომასწავებელი იყო მოსკოვის ულტიმატუმიც, რომელიც სამ დღეში სტატუსკვოს აღდგენას მოითხოვდა... წინამდევ შემთხვევაში სხვა ზომებს მივმართავთ—იმუქრებოდა ის. რა ზომები იყო ეს, აღრევე იცოდა ჩინეთთა თვით ყარახანის მაგალითიდან, როცა ჩან-სო-ლინის მიერ რუსეთის საელჩოს გაჩხრევის შემდეგ, პეკინში, ელჩმა მოსკოვს მოკუტრცხლა. ესლა სამაგიერო გადაუხადა ყარახანმა ჩინეთის ელჩს მოსკოვში—აიძულთა წასულიყო, თავისით კი დიახაც არ მოუკუტრცხლავს მხდალი ყარახანციოთ.

ამასთანავე, დიდმა სახელმწიფოებმა დაიხსნეს მოსკოვი სასაცილო მდგომარეობიდან, რადგან, ცხადია, გარდა დიდი ზარალისა, მას მოვლოდა საერთაშორისო ყბადალება. ამოქმედთა სამინისტროები ვაშინგტონსა და პარიზში: მოსკოვმა ხომ სელი მოაწერა კელოვის პაქტს, აგრეთვე ნანკინმა, ამბობს სტიმსონი, და ამასვე გადასცემს ბრიანი ორივე ქვეყნის ელჩებს. დიახაც რომ მოვაწერე—ერთნაირათ უპასუხებენ მოსკოვიდან და ნანკინიდან—, მე არც კი მიფიქრია ომი, ოლონდ მეორე მხარე თავის საზღვრებში დაეტიოსო.

და, მართლაც, ისინი სიამოვნებით ეტევიან თავიანთ საზღვრებში, მიუხედავთ სარღვების დანიშვნისა და იარაღის ძალიან მორიდებულთა ჩხარუნისა. მოსკოვი მაღლობას უთვლის პარიზს, ხოლო შენს შუამავლობას ვერ მივიღებ, ჩინეთს უშუალოთ

უნდა ველაპარაკოვო. პარიზში იცინიან: ვერ გაგიგიათ, ჩვენ შუამავლობა კი არ შეგთავაზებთ, კელოვის პაქტი მოგაგონეთო.

და საქმე იმით თავდება, რომ მოსკოვი და ნანკინი მართლა იწყებენ უშუალო მოლაპარაკებას, მხოლოდ... იმ განსხვავებით, რომ პირველი ფაქტიურათ ჩამოშორებულია თავის ქონებასა და უფლებას მანჯურიაში, მეორე კი მწათა თვეები და წლები ილაპარაკოს «რევოლუციურათ» წართმეულის შესანარჩუნებლათ. ამას ხომ კიდევ ულტიმატუმის პასუხად შესთავაზებდა ნანკინი მოსკოვს!

არსებითათ, თავის განხილვაზე დიდხანს არ შევაჩერებთ მკითხველს. ჩინეთ-აღმოსავლეთის რკინისგზა მილიარდ ოქრომდე უღირად ცარების მთავრობას, რომელმაც ამ თანხის ნახევარზე მეტი ფრანგებისგან იხსნა; ის გაგრძელება მთავარი ძარღვის—ციმბირის დიდი ლიანდაგის—ოკეანემდე, ვლადივოსტოკში. აქედან, მისი მნიშვნელობა განუზომელია. მოსკოვისთვის მას კიდევ ის მნიშვნელობა ჰქონდა, რომ ყოველ წლივ მილიონებს იღებდა ამ გზიდან, უცხო ვალიუტის სახით.

ოქტომბრის გადატრიალების შემდეგ, ყველას ეგონა, რომ ჩინეთ-აღმოსავლეთის გზას იაპონია დეპარტრინებდა და მით «დაარგვალებდა» რუსეთისგან 1905 წ. წართმეულ ჩინეთ-სამხრეთის გზას. მაგრამ ეს არ მოხდა; ვაშინგტონის კონფერენციამ, 1922 წ., განსაკუთრებული მზრუნველობაც კი გამოიჩინა, რომ გზა საერთო სარგებლობაში დარჩენილიყო და ვალებიც გაესტუმრებია. ამასობაში მწვავედბა სამოქალაქო ომი ჩინეთში და მოსკოვი სარგებლობს ამით, რომ შეუთანხმდეს პეკინის და მუკდენის მთავრობათ, რასაც კიდევ აღწევს 1924 წ. მან ბეიჩი დასთმო. მაგ., გზის სადარაჯო ჯარის ყოლა მანჯურიაში, მაგრამ მართველობის და მოგების მენახვერობა მაინც დაიტოვა თავისთვის.

შემდეგ ხომ კომინტერნის დამარცხება მოხდა ჩინეთში, რომლის რევოლუცია უფრო ხერხემლიანი გამოდგა, ვინემ მოსკოვიტების, აქედან აშლა და გადაკიდება ნანკინსა და მოსკოვ შორის. ჩინეთ-აღმოსავლეთის გზა უძლიერესი იარაღი გახდა მოსკოვის ხელში გაერთიანებულ ჩინეთის ისევ ასაფეთქებლათ... ეს ხომ კომინტერნის ხელობაა და ამ გაზაფხულს მომხდარმა ჩხრეკა-ჰერამ ხარბინში მართლა აღმოაჩინა ნამდვილი შეთქმულობა. მოსკოვიტებს, სხ. შორის, ჩინეთის მესვეურთა ტერორით მოსპობა განუზრახვთ, ჩინეთ-აღმოსავლეთის რკინის-გზის დანგრევაც კი!

რატომ ეს უკანასკნელი? იმიტომ, რომ 1936 წელს ვადა გაუდის მოსკოვის კონცესიას და გზა ისედაც ჩინეთზე უნდა გადავიდეს. ნანკინმა ისარგებლა მოსკოვის ვერაგული მოქმედებით და ნება დართო მუკდენის ხელისუფლებას ერთის დაკვრით მოედო ბოლო მისი თანაწილობისათვის ჩინეთ-აღმოსავლეთის რკინის-გზაზე. აქედან კონფლიქტიც.

რატომ არ მოისურვა მოსკოვმა კონფლიქტის საერთაშორისო სამსჯავროზე გამოტანა? განა ცხადი არ იყო მისთვის, რომ ხელშეკრულების დარღვევას ჩინეთს არავინ მოუწონებდა? აიღეთ სტიმსონი, ამე-

რიკის საგარეო მინისტრი, ისიც კი მოითხოვდა ჩინეთისგან სტატუს-ჰეოს აღდგენას, სანამ მოლაპარაკება დაიწყებდნენო.

მაგრამ საერთაშორისო სამსჯავრო ხომ კომინტერნის დაუსრულებელ პროვოკაციებსაც გამოაშკარავებდა! განა ხარბინში დაჰეროილ გეგმებში არ ამოიკითხავდნენ იმავე კომინტერნის დაუზარებელ ბრძოლას საზოგადოთ იმპერიალისტურ კონცესიების წინამდევ ჩინეთში? რას ეტყოდა მაშინ მოსკოვი იმპერიალისტებს?

აი, რომ არჩევენა მოსკოვს «უშუალო» გზა ჩინეთთან, თუ გინდ მას მანჯურიაზე ხელის დაბანაც კი მოუხდეს. მოუხდება ალბათ, რადგან მას არ ძალუქს საკუთარის ძალით რუსეთის ღირსებისა და უფლების დაცვა.

მით უფრო, რომ ახლათ ფეხადგმული დიდი ჩინეთი სტიქიურათ ესწრაფვის ყველა კონცესიების და უთანასწორო ხელშეკრულებათა გაუქმებას. და ამიტომ დაიწყა მან... რუსეთიდან, როგორც უფრო სუსტიდან!

ცხადია, რად წაესარჩლეს დიდმა სახელმწიფოებმა მოსკოვის კონცესიას,—გამოდის, იმპერიალისტებმა გადაარჩინეს საბჭოთა კავშირი სასტიკ დამარცხებისა და დაშლისაგან!

ამერიკამ იმიტომ აღიმალო პირველმა ხმა, რომ მას ეშინოდა იაპონიის ჩარევის, რომელიც მანჯურიის გადმომდამო იყურება, ციმბირისკენ. საფრანგეთი ნახარჯია, როგორც იტყვიან, ინგლისსაც თავისი კონცესიები აფიქრებს... ერთი სიტყვით, დიდ სახელმწიფოთა საერთო ინტერესები თუ მათი დაპირდაპირება—აი რა შევლის რუსეთს ხიფათი თავიდან აიცილოს.

ისე, როგორც ოდესმე ოსმალებს! წითელ სულთანს დიდი დიპლომატის სახელი ჰქონდა გავარდნილი, რადგან ის მოხდენილათ იყენებდა დიდ სახელმწიფოთა ურთიერთ მეთქმებას, რომ თავი დაეძვრინა დღეს ერთის, ხვალ მეორის კლანჭებისაგან.

შესწევს კი ეს ხერხი და უნარი სტალინს? არა, და ეს უფრო იმიტომ, რომ ის სხვა მეთოდს მიმართავს: პირველ აგვისტოს! ე. ი. ომი ყველა ქვეყნებს მათივე მშობლივი ხალხის წასევით.

ეს მეთოდი არ ამორებს, პირიქით, ახლოებს რუსეთისთვის უდიდეს ხიფათს გარედან. დიდი სახელმწიფოები, რომელნიც ხედვენ, რომ ერთი ვეება სახელმწიფო, დედა-მიწის მეექვსედი, სულ იმის ცდაშია, რომ ისინი შიგნიდან ააფეთქოს, ბუნებრივია, თუ თავის ზომებს მიმართვენ...

მაშასადამე, სტალინს არ დარჩენია ის გაძრომ-გამძრომის შანსიც, რაც წითელ სულთანს ჰქონდა; უნდა ჩხრიკოს, სანამ თავის დასაკლავ დანას არ გამოჩხრეკს.

უნდა გვეურებიათ, როგორ შევხედნენ რუსის ემიგრანტები რუსეთ-ჩინეთის კონფლიქტს! მარცხენა ბანაკში ერთი ცას შედლადებდა, მეორე მიწას: ომი ნუ, თორემ დაიშლებაო (რუსეთი). მარჯვენა ბანაკში გულს იფხანდენ: ომმა შვა, ვინძლო ომმა შთანთქასო (ბოლშევიზმი). იქ, მანჯურიაში, «თეთრები» ჩინელებს უქირავდებიან სამშობლოზე შესატევათ!



არავის ვახსენებია თვით რუსის ხალხი, არსიდან ბრძოლის ყიჟინა ერთად ერთ მტერის—კრემლის შემამუსრათ.

როგორ გნებავთ ამის შემდეგ, უცხოეთს პატივი და რიდი ჰქონდეს რუსეთისა! ამ უკანასკნელმა 12-მა წელმა ბევრი რამ ასწავლა უცხოეთს და, სს. შორის, ისიც, რომ ბოლშევიზმი ერთგვარი ჭირია, რუსული ჭირი, არგადამდები, მართალია, როგორც ეს დაამტკიცეს დასავლეთის და აღმოსავლეთის ქვეყნებმა, მაგრამ მით უფრო საშინელი, რამდენათ საბჭო-

თა მთელი სახელმწიფო აპარატი მის ძალათ შესაბუნებებს ლამობს სხვა ქვეყნების საღ ორგანიზმში.

ამ რიგათ, რუსეთიც იბრძვის თავისებურათ, როგორც ოსმალეთი ოდესმე, სოლო პირველი იმასვე მიაღწევს უფრო ადრე, ვინემ მეორემ მიაღწია: დაშლას ეროვნულ სახელმწიფოებად...

მაშინ დაიწყება თვით რუსის ხალხისთვის ნამდვილი ეროვნული ისტორია, ნაცვლათ ბოლშევიკურ-კოსმოპოლიტურისა.

ს ა ქ ა რ თ ვ ე ლ ო ც ი ვ რ ე ბ ი თ

(ცნა ჩვენი ქვეყნის ეროვნულ მეცნიერების მიმდინარეობას)

3.

საქართველოს სოფლის და ქალაქის დამოკიდებულების გასაშუქებლად საქიროა ვიცოდეთ ყველა ჩვენი ქალაქების მოსახლეობის რაოდენობა.

აქაც უნდა ვსთქვათ, რომ ჯერ-ჯერობით ამოცნა იქმნება, გავიგოთ ამ მოსახლეობის სწორი და უტყუარი რიცხვი. ჩვენ ყოველთვის უნდა გვახსოვდეს, რომ საქართველოს შესახებ სტატისტიკური მასალები უმთავრესად ან «ცარიზმის» დროსაა შეკრებილი და ან ბოლშევიკების. მიუხედავად იმისა, რომ სტატისტიკურ დაწესებულებებს არც მაშინ აკლდათ და არც ცხლა აკლიათ სინიდიისიერი მუშაკები, პროფესიონალი რიგიანობით ცნობილნი,—ჩვენ მაინც ვერ ვენდობით საფხვებით ამ ხანებში დაგროვილ მასალებს. საქმე სტატისტიკურ მშრალ მასალის დაგროვება-კი არ არის, მთავარია ამ მასალის გადამუშავება, შეჯგუფება და უტყუარი ჯამების და დასკვნათა გაკეთება, რაც უადრესად მოითხოვს მეცნიერულ მეთოდების მტკიცეთ მომარჯვებას, პროფესიონალ კეთილ-სინდიისიერებას და პოლიტიკურ რიგიანობას. ასეთ რამეებზედ-კი ბოლშევიკური ხელმძღვანელები ისევე შორს სდგანან, როგორც შორს იყვნენ «ცარიზმის» ბიუროკრატები...

როგორც წინა წერილიდან დაგინახეთ, უკანასკნელი ოფიციალური წყაროები საქართველოს ქალაქების მცხოვრებთა საერთო რიცხვს უჩვენებენ 564.321 სულს. ამ ჯამში ქ. ტფილისის მოსახლეობის რაოდენობა ჩაითვლება 289.900, მაშინ როდესაც

თვით ბ-ნი რუხაძე, ეს ნაფიცი ბოლშევიკი-ეკონომისტი მოწმობს, რომ იმ წელს (1926) ჩვენი დედა-ქალაქის მოსახლეობა შეადგენდა 294.044 სულს. ჩვენისთანა პატარა ერისათვის ათი-ათასების მომატება-დაკლება საგრძნობი შედეგების მომასწავებელია და ამიტომაც არის, რომ ერთობ დიდი სიფრთხილეა საქირო ბოლშევიკური მასალების სარგებლობის დროს.

1926 წლის ოფიც. მასალებში ნაჩვენებია, რომ 36.260 სული ბინადრობდა დაბებში. ამნაირად საქართველოს სოფლის გარეთ, ე. ი. ქალაქებში და დაბებში ერთად ცხოვრობდა სულ (564.321+36.260)=600.581 ორივე სქესისა. ეტყობა ზოგიერთ შემთხვევაში დაბების მოსახლეობის ერთი ნაწილი ქალაქის მცხოვრებლებლად ჩაურთიკხავთ და დანაშთენები-კი სოფლის მოსახლეობასთან მიუწერიათ. ამით უნდა ავხსნათ ის გარემოება, რომ ზოგან (იხ. ე. პაპავას საყურადღებო წერილი ჟურ. «კავკასიონში». წიგნი მეორე. პარიზი) საქართველოს ქალაქების მოსახლეობა აყვანილია 594.221 სულამდე და სოფლისა—2.072.273-მდე (იქვე).

ასეთი მითვლა ჩვენც მიზან-შეწონილად მიგვაჩნია. ყოველს შემთხვევაში ჩვენებურ ზოგ დაბას უფრო აქვს ქალაქური ელფერი (არანაკლები, მაინც!) ვიდრე ამისთანა, ძველადვე ქალაქად ცნობილს ერთეულს, როგორიც, მაგ. ახალქალაქია (ჯავახეთში).

ამნაირის შესწორების შეტანით საქართველოს მოსახლეობა (1926 წ.) ასეა განაწილებული:

ქალაქად	პ რ ო ც.	ს ო ფ ლ ა დ	პ რ ო ც.	ს უ ლ
594.221	22.3	2.072.273	77.7	2.666.494 (ე. პაპავა).

საინტერესოა გავეცნოთ, როგორია ეროვნებათა ხვედრითი წონა რესპუბლიკის მოსახლეობის ამ დანაწილებაში:

ეროვნებანი	ქალაქებში მდებინადრენი	პროც.	სოფლად მდებინადრენი	პროც.
ქართველები	286.756	48.25 პროც.	1.501.430	72.45 პროც.
სომხები	149.545	25.16 პროც.	157.473	7.59 პროც.
რუსები	70.403	11.84 პროც.	25.682	1.23 პროც.
ყველა დანარჩენები (10-ე ირიცხ.	87.517	14.75 პროც.	387.688	18.73 პროც.
სულ:	594.221	100 პროც.	2.072.273	100 პროც.



რომ უფრო ნათლად გავერკვიოთ აქ მოყვანილ ცნობებში, საქიროა ისიც ვიცოდეთ—რა ცვლილება ხდებოდა ერთს რომელსავე პერიოდში. ამისთვის მოვიყვანოთ უფრო დეტალურს ცნობებს 1917 და 1926 წლებ.

წლები	ქართვ. პრ.	სომხები პრ.	აზერ. თ. პრ.	ოსები პრ.	რუსები პრ.	აფხ. პრ.	დან. პრ.	სულ.
1917 *)	1.800.910 73	197.360 8	98.680 4	197.360 8	49.340 2	49.340 2	74.010 3	2.467.000.
1926	1.788.186 67,1	307.018 11,5	137.921 5,2	113.298 4,3	96.085 3,6	56.847 2,1	167132 6,2	2.666.494.
ჯამი მომ. (+), ან დაკლებ (-) 1926 წ.	-12724	+109.658	+39.241	-84.062	+46.745	+7.507	+93.129	+199.494.

ბევრს რასმე მეტყველებენ აქ მოყვანილი ცხრილები.

საკმაო არის ადამიანმა, ოდნავათაც არის, გადაავლოს თვალი ამ არითმეტიკულ ნიშნებს, რომ მის წინ გადიშალოს სრული სურათი ქართველი ერის იმ შევიწროების და დამცირებისა, რომელსაც განიცდის ჩვენი ხალხი, აგერ 120 წელიწადია, რუსებისაგან: მათგან პატივ ახდილი და უფლებას აყრილი.

თუ 1917 წლის ცნობებს ჩავთვლით, როგორც იმ ჯამს, რომელიც «ცარიზმის» ბატონობას ახასიათებს ჩვენში,—1926 წლის ცნობები მოწმობენ საქართველოში იმ შევიწროებას, რომელიც აგერ 8 წელიწადია ადგია მას ბოლშევიკების თარეშობით.

ვეცნობით აქ მოყვანილ სტატისტიკურ მასალას და გულახდით უნდა აღვიაროთ, რომ ვერ გავგვიბედნიარებულა ის დასკვნა გამოვიტანოთ, რომელიც ძალაუხერხებულად გველანდება წინ. ჩვენ გვინდა ვიფიქროთ, რომ აქ რაღაც შეცდომა უნდა იყოს. ქართველი ერის ასეთი განადგურება, რომელიც ამ ცნობებში მოსჩანს, სწორედ განმეორებაა ალა-მაჰმადის მიერ საქართველოს აკლებისა. თუ 1917 წელს ქართველების რიცხვი საქართველოში 1.800.910 იყო (როდესაც საერთო მოსახლეობა 2.467.000-ს უდრიდა), ცხრა წლის შემდეგ, ე. ი. 1926 წელს, ქართველების რაოდენობა სულ ცოტა, 1.962.990 მდი უნდა ასულიყო. და აი რატომ: წლიური ზრდა ქართველი ერისა ჩვენგან მიღებულია 1,1 პროცენტით დაბალ ზომად უნდა ჩაითვალოს, შედარებით ჩვენ მეზობელ რესპუბლიკებთან. სიმარტივისთვის ვიანგარიშოთ მხოლოდ ერთი პროცენტი. ეს მოგვცემს მომატების ჯამს 162.080 ორთავ სქესისას. როგორც ცხრილი გვიჩვენებს ქართველების რიცხვს მომატების მაგიერ დაუკლია 12.794 სული, და ამ რიგად 1917 წლიდან დაწყებული ჩვენი ერის დეფიციტი გამოდის (162.080 - 12.794) = 174.874 (დანამდვილებით-კი, ე. ი. 1,1 პროცენტის ანგარიშით დეფიციტი 191.074-მდე აღის).

1917 წლის ცნობები ჩვენ ამოვიღეთ პატივცემულ დ. აფხაზის წიგნიდან, (Les richesses naturelles de la Géorgie), რომელიც სარგებლობდა რუსულ ოფიციალურ წყაროებს. მას ნაჩვენები აქვს ეროვნებათა ხვედრითი წილი საქართველოში მხოლოდ პროცენტებით. რაოდენობის გამოანგარიშება კი ჩვენ მოვხდინეთ და სიფრთხილისთვის სხვებსაც შევამო-

\*) თუმცა 1917 წლის საქართველოს საზღვრები ის არ არის, რაც 1926 წელს გახდა, წყალობითა და შეწვევითა ბოლშევიკებისა, მაგრამ ამ გარემოებას არ უნდა მოეხდინა გავლენა საკუთრივ ქართველ მოსახლეობის რაოდენობაზე.

წმობინეთ, ასე რომ, ვგონებთ, შეცდომა არა დაგვიშვია რა.

1926 წლის ცნობებიც ოფიციალურ წყაროებიდანაა ამოღებული, ისევე რუსის მოხელეების მიერ გადამუშავებული, იმ განსხვავებით, რომ ამ შემთხვევაში ეს მოხელეები ბოლშევიკები არიან. ასე რომ თუ რამე შეცდომაა აქ დაშვებული, იმ რუს მოხელეების ბრალია, რომელნიც 1917 წ. და 1926 წ. ამუშავებდნენ საქართველოს სტატისტიკას. ქართველ მოდგმის მოსახლეობის ასეთი დაკლება ჩვენ შეუძლებლად მიგვაჩნია და თუ ზემოდ მოყვანილი ცხრილები რამეს მოწმობენ, ეს მხოლოდ—მათი სტატისტიკის უფარვისობას! ამიტომ ჩვენ დღესაც დანამდვილებით არ ვიცით, როგორია საერთო რიცხვი ქართველებისა და საზოგადოთ საქართველოს რესპუბლიკის მცხოვრებთა. პირადათ ჩვენც ვეცადეთ სხვა საშუალებებით, მოხვეულის გზით. გამოგვერკვია ქართველების რაოდენობა ჩვენს სამშობლოში; ყველა საქირო მასალის უქონლობის გამო სხვადასხვა რაოდენობას ეღებულობთ; აქ არ მოგვყავს ის ჩვენი ანგარიში, მხოლოდ ვიტყვი, რომ მიხედვით არსებული მასალებისა, ძალიან შესაძლებელია, რომ ორ მილიონამდეც იყოს ქართველი მოდგმის მოსახლეობა საქართველოში. სიფრთხილისთვის კი ვიტყვი, რომ ქართველების მოსახლეობა უნდა იყოს—ორი მილიონი.

ნამდვილი რიცხვი მხოლოდ მაშინ გვეცოდინება, როდესაც ხელ-მეორედ მოხდება ჩვენი ერის აღრიცხვა, სწორი მეცნიერული მეთოდების მიხედვით და, რასაკვირველია, სულ ახალის ხელმძღვანებლები მეთაურობით. მანამ-კი, მეტი ღონე არ არის, უნდა ვისარგებლოთ ის, რაც გვახადია, სადაც თუ აბსოლუტურ სიმართლეს ვერ ვაოვებთ, იმ ტენდენციას მაინც ვიხილავთ, რომლითაც ხელმძღვანებლობდნენ საქართველოს ძველი და ახალი მამინაცვლები.

ეს ტენდენცია სრულიად მარტივია: შემოღება საქართველოში ისეთი პოლიტიკურ, ეკონომიურ, ადმინისტრაციულ და სხვათა ზომების, რომელნიც ხელ შეუშლიან ქართველ მოსახლეობის ზრდას და გაღონიერებას, და სამაგიეროდ კი ხელს შეუწყობენ არა ქართველი ელემენტების გამრავლებას; სულ ერთია ვინც უნდა იყოს ეს ელემენტები, ოღონდ კი მოსახლეობა ისე აქრელდეს, რომ თვით საფუძველი გამოეთხაროს საქართველოს დამოუკიდებელ და თავისუფალ არსებობას. ყველა ეს ნათლად მოსჩანს 1917 და 1926 წლების ცნობების შედარებით და თუ ბოლშევიკურ სტატისტიკას მეტი ცნობის მოცემა არ შეუძლიან, ესეც საკმაო არის, რომ ქართველებს ერთხელ კიდევ, ამ შემთხვევაში უკვე ციფრებით, დაგვიყენოს თვალწინ ის საშიშროება, რომელსაც



ასეთის ვერაგობით უმზადებენ ჩვენს ქვეყანას დღევანდელი მისი მტარვლები.

ვიმეორებთ, აქ მოყვანილ ცხრილების აბსოლუტური ციფრები ჩვენ ყალბად მიგვაჩნია, ჩვენთვის საყურადღებოა იმ ტენდენციის გამომქავეება, რომელიც ამ მასალებში მოსჩანს, ტენდენციის, რომელიც ასე დამახასიათებელია რუსული პოლიტიკის საქართველოში და მათი ყურმოჭრილ ყმების და თანამშრომლების ქართველ ბოლშევიკ-კომუნისტების. მაგრამ სულ ამაოა მათი ცდა. საქართველოს მტრებს ჩვენ ვეტყვიტ შემდეგს: აგერ 120 წელიწადია, რაც ქართველების განადგურების პოლიტიკას მისდევთ; თქვენზედ წინაც ყავდა საქართველოს მტრები, რომელნიც დედა-მიწის ზურგიდან ალგვას უქადდენ მას; ბევრმა სწორედ თქვენისთანა ზომებსაც მიმართა საქართველოს ერის მოსასპობად; მართალია, თქვენზედ უსაძაგლესი ხერხები აქამდინ არავის მოუგონია ჩვენს საწინააღმდეგოთ, მაგრამ... საქართველო მაინც ცოცხლობს. ორი ათასი წლის ისტორიამ შესძინა ჩვენს ერს ის უძლეველი ძალა, რომელსაც იგი გამარჯვებული გამოყავს თვით უსწორო ბრძოლაშიც, და აი მაგალითები.—ამას ჩვენ ხომ არ ვამბობთ, თქვენ თვითონ ხართ იძულებულნი აღიაროთ ეს სიმართლე. მაინც!—

მიუხედავად ქართველ ერის საწინააღმდეგოთ მიმართულ ზომებისა, თქვენ თვითონ მოწმობთ:

1926 წელს საქართველოს მოსახლეობა უდრიდა 2.666.494 სულს, ორივე სქესისა.

აქედან ქართველები შეადგენენ დიდს უმრავლესობას=67,1 პრ.; ქალაქებში მცხოვრებთა შორისაც პირველობა ქართველებისაა: 48,25 პრ., სოფლის მოსახლეობის დიდს უმრავლესობას მაინც ქართველები შეადგენენ 72.45 პრ.!

ეს ცოტაა: ქართველი ერის მნიშვნელობა დიდია არა მარტო თქვენს ტყვეობაში მყოფ საქართველოში. ქართველებს პირველი ალაგი უკავიათ, თქვენი-სავე ცნობებით, სრულიად ა.-კავკასიის მცხოვრებთა შორისაც: (იხ. 1927 წლის «სტორიკი»).

1922-23 წლებში, საერთო რიცხვი მცხოვრებლების ა.-კავკასიაში ყოფილა 5.082.985 და აქედან:

აფხაზნი	ადერქი	სომხები
0,7 პრ.	23,8 პრ.	23,5 პრ.
ქართველები	რუსები	დანარჩენი
34,6 პრ.	5,2 პრ.	12,2 პრ.

დიად, მიუხედავად ათასი ტანჯვის, წყევტის და წამების ქართველი ერის დღევანდელი სწორედ ასეთია, რომლის დადარვა საქართველოს მტერთაც კი ვერ მოუხერხებიათ.

დიად, საქართველო ცოცხალია!

(გაგრძელება იქმნება)

—ლი—გ.

### უკრაინის საკითხი

#### 1. ეთნიკური მხარე.

უკრაინის ერს უკავია ფართო ტერიტორია, 800 ოთხკუთხ კილომეტრზე მეტი, ე.წ. საფრანგეთზე მეტი ადგილი). წმინდა უკრაინული მოსახლეობა შეადგენს 37 მილიონს. ეს ხალხი განსხვავდება გარემო ხალხებისგან ანთროპოლოგიურად, ეთნოგრაფიულად, თავის გადმოცემებით და ჩვეულებებით. ანთროპოლოგიური გაზომვა ნათლად ააშკარავებს უკრაინელ ერის განსხვავებულ ტიპს, მის ეროვნულ თავისებურებას. იგი განსხვავდება ველიკორესებისაგან მეტად გარკვეულის ნიშნებით. ამ ორ ერს შუა ეთნიკური საზღვრის დანახვა მეტად ადვილია. ამისთვის საკმარისია ზერყელე თვალის გადავლება. ერთ მხარეზე თქვენ ხედავთ უკრაინულ წესით დალაგებულ და აშენებულ სოფლებს, მეორე მხარეზე—გეგმა და ნაშენობა წმინდა რუსულია. უკრაინულ სოფელში პატარა თეთრი სახლებია, ისლით დახურული და ყველა გარშემორტყმულია ბალით და ისეთ შთა-

ბეჭდილებას დებულობთ, თითქმის მთელი სოფელი მწვანეშია გახვეული. რუსების სახლებს კი მოწყენილობის ბეჭედი აწის, როგორც ჩრდილოეთის შენობებს. იშვიათად თუ შეხვდებით გარშემო ხეებს. სახლი ხისაა, შეუღებავი, დაღვრემილი სახის; დახურულია ფიცრით და დაქანებულია სახურავი ორ მხრისკენ და არა ოთხის მხრით, როგორც უკრაინაში. ეზო და სახლების შიგნით მორთულობაც სულ სხვა და სხვა ნაირია რუსების და უკრაინელების. საზღვარზე, სადაც რუსები და უკრაინელები მეზობლად ცხოვრობენ, ვერსად შეხვდებით შენობებს ნაწილობრივ უკრაინულად აგებულს და ნაწილობრივად რუსულად, არ ხდება ამ ორი ტიპის შერევა.

განსხვავდება უკრაინელების დარუსების ტანსაცმელი, წესი, ჩვეულება. რუსის და უკრაინელი გლეხები ერთმანეთის ქალებს ცოლებათ არ ირთავენ. ამ ორი ტიპის ხასიათი იმდენად განსხვავებულია, რომ უკრაინელი შუაგულ რუსეთში გადასახლებული შეულახავათ იცავს თავის ინდივიდუალობას, აგრეთვე რუსიც, უკრაინელთა შორის დასახლებული.

ეს განსხვავება აიხსნება ანთროპოლოგიით და ისტორიით. ველიკორუსული ერი აღორძინდა ჩრდილოეთში მცირე სლავურ მოსახლეობის და ფინურ მოდგმათა დიდი უმრავლესობის შერევისაგან; ამ შერეულ ერს შერჩა სლავური ენა, მაგრამ ანთროპო-

\*) ეთნოგრაფიულ უკრაინაში შედის შემდეგი გუბერნიები—კიევის, პოლტავის, პოდოლის, ვოლინის, ჩერნიოვიის, ეკატერინოსლავის, ხარკოვის, ხერსონის, ხოლმის, აღმოსავლეთ გალიციის, უკრაინული ბუკოვინის, ჰუნგრეთის უკრაინა, უკრაინული ბესარაბია, და მხარები გოდონოს, მინსკის, ტავრიდის, დონის, კურსკის, ვორონეჟის, ყუბანის, სტავროპოპოლის და ჩერნომორის გუბერნიებისა.

ლოგიურად ფინებმა დასძლიეს სლავები; ფინების სიძლიერე სჩანს რუსების ტანსაცმელსა და მათ მი- თოლოგიაში.

უკრაინელებმა კი, თუმცა წარსულში განიცა- დეს ზოგიერთი აღმოსავლეთური გავლენა, გაცილე- ბით უფრო წმინდათ შეინახეს სლავური ხასიათი. ეთნოგრაფიულად უკრაინელი უფრო უახლოვდება სამხრეთის სლავებს, ვიდრე რუსებს, თუმცა უკრაინ- ული და რუსული ენები ეკუთვნიან აღმოსავლეთ სლავების ენათა ერთ ჯგუფს.

ისტორიაც ადვილათ გვაძლევს თავის მხრით გა- ნსხვავების განმარტებას. საუკუნეთა განმავლობაში უკრაინელებს და რუსებს საერთო საზღვარი არ ჰქონ- დათ. მომთაბარე თემებს ფართო ადგილები ეკავათ და უკრაინელი ხალხი იძულებული იყო დაეკირა ჩრდილოეთის ნაწილი და განსაკუთრებით დასავლეთ- ით ამ ადგილებს. რუსის ერი შესდგა ჩრდილოეთ- ითი, მოსკოვთან. იგი ვერ ბედავდა ღრმად შეჭრი- ლიყო სამხრეთის სტეპებში, სადაც მომთაბარეებს საშინელი ძალები ჰქონდათ. მხოლოდ შემდეგ, როცა ეს ძალები შემცირდა, და უკრაინელები მიიწვედნენ აღმოსავლეთისკენ (17-18 საუკ.), ისინი შეხვდნენ რუ- სებს, რომლებიც თავის მხრით გადადიოდნენ სამხრე- თისკენ.

როცა ორი, ერთიმეორის ცოტად თუ ბევრად მონათესავე, ხალხი, როგორც მაგალითად სერბები და ბულგარები, მეზობლად ცხოვრობენ საუკუნეთა მანძილზე და ჯერ კიდევ არ არიან გამოკვეთილნი ეთნიურად, ისინი აუცილებლად ახდენენ ერთმანეთ- ზე გავლენას და საზღვარზე კიდევ აირევიან ერთმა- ნეთში. ხოლო უკრაინელები და რუსები დაუმეზო- ბლდნენ ერთმანეთს მაშინ, როცა მათი ეთნიური კუ- ლტურა უკვე შემუშავებული იყო და აღარ შეეძლოთ გავლენა მოეხდინათ ერთმეორეზე.

ესევე უნდა ითქვას უკრაინულ და რუსულ ენე- ბის შესახებ. უკრაინული ენის არსებობა დღეს უკვე სადავო აღარაა. დამტკიცებულია, რომ იგი სრუ- ლიად დამოუკიდებელი ენაა და ეკუთვნის აღმოსავ- ლეთურ სლავურ ჯგუფს (უკრაინული, რუსული და ბელორუსული). ასეთი აზრი მარტო უკრაინელ მეც- ნიერებს არ ეკუთვნის, ამას იზიარებენ ევროპის საუ- კეთესო სლავისტები და მათ შორის რუსის ფილო- ლოგები. როცა 1905 წ. რუსეთის მთავრობა შეეკით- ხა პეტერბურგის აკადემიას—შესაძლებელია თუ არა ბეჭდვა უკრაინულ ენაზე, ისეთმა მეცნიერებმა, რო- გორიც იყვნენ შახმატოვი, კორში. ფორტუნატოვი, ლაპო-დანილევსკი, ოვსიანიკოვ-კულიკოვსკი, წარა- დგინეს მოხსენება, სადაც გადაჭრით ამტკიცებდნენ მეცნიერულად, რომ უკრაინული სრულიად განსხვა- ვებული ენაა. და თავის დებულების დასადასტურე- ბლად რუსის მეცნიერებმა მოიყვანეს თითქმის იგი-

ვე ისტორიული განმარტებანი, რომლებიც ჩვენ ზე- მოდ მოვიხსენიეთ.

«თვით ისტორიის დასაწყისში საერთო რუსული ენა დანაწილებული იყო დიალექტურად, რაც გვაძ- ლევს ნებას ვიფიქროთ, რომ რუსის თემები დაყოფი- ლი იყვნენ სამ ჯგუფად: ჯგუფი ჩრდილოეთისა, ჯგუფი ცენტრისა და ჯგუფი სამხრეთისა. სამხრეთის საბუთები, როგორც ეს აკად. სობოლევსკიმ დაამტ- კიცა, მე-11-12 ს. შეიცავენ უკვე უკრაინულ ენის და- მახასიათებელ თვისებებს; დაბეჯითებით შეიძლება ითქვას, რომ უკრაინული დიდათ განსხვავდებოდა ცენტრისა და ჩრდილოეთის კილოებისაგან ჯერ კი- დევ მონგოლების წინა პერიოდში. ეს განსხვავება არ შეუჩერებია აღმოსავლეთის სლავების პოლიტიკურ გაერთიანებას 10-11 ს. (კიევის სამთავრო). პირიქით, ამ ტერიტორიების პოლიტიკურმა დაშლამ, რაც შემდეგში მოხდა, პოლიტიკური ცენტრის დაარსე- ბამ მოსკოვთან, კიევის დამხობამ მე-12 ს. ბოლოს— ყველაფერმა ამაზ ხელი შეუწყო სამხრეთის განცალ- კევებას, რომელიც დაამთავრა მონგოლების შემო- სევამ. ლიტურგ-რუსულ სახელმწიფოში (რომელიც ბევრს უკრაინულ მიწას შეიცავდა) სამხრეთის თემე- ბი დაუახლოვდნენ ცენტრის თემებს და აქედან წარ- მოიშვა მერმე ბელორუსული ხალხი. მხოლოდ კო- ლონიზაციის შემწეობით 17-18 საუკ. დაუახლოვდნენ ერთმანეთს უკრაინელები და ველიკორსები. ამგვარად ისტორიულმა პირობებმა ხელი შეუწყო უკრა- ინის და რუსეთის დაშორებას, ამით აიხსნება მათი ენების განსხვავებაც. ამ ხალხების ისტორიულმა ცხოვრებამ ვერ შექმნა საერთო ენა და პირიქით გა- აღრმავა ის განსხვავება, რომელიც ემჩნეოდა ჯერ კიდევ რუსებისა და უკრაინელების უძველეს წინა- პრების კილოებს».

უკრაინელი ერი, რომლის ენა სრულებით გან- სხვავებულია მეზობლების ენისაგან, თავის ვრცელ ტერიტორიაზე წარმოადგენს თითქმის აბსოლუტურ ეთნიურ ერთეულს და ეს განსხვავება თუ ძნელად შე- სამჩნევია სადმე, მხოლოდ ჩრდილოეთის საზღვარზე და კარპატების რაიონში.

ეს შესანიშნავი მთლიანობა აიხსნება გადასახ- ლეობა-გადაჯგუფებით, რომელიც ხდებოდა ხშირად უკრაინელებში გარეშე ტომების თავდასხმისა და შემოსევის დროს. სხვადასხვა რაიონების უკრაინე- ლები ხვდებოდნენ ერთმანეთს, ირვოდნენ, ეგუებოდნენ ერთიმეორეს და ამგვარად ჰქმნიდნენ ერთს ეთნიურ ტიპს.

ალ. მულგინი

უკრაინის რესპუბლიკის ორწმუნებული; ყოფილი საგარეო საქმეთა მინისტრი.



ლ ო ლ ვ ი ლ თ ა    პ რ ო ბ ლ ე მ ა

ეს პრობლემა ევროპაში ახალი არაა. პოლიტიკური ემიგრაცია დიდი ხანია არსებობს აქ და ზოგიერთ ისტორიულ ხანებში მწვავე ხასიათიც მიუღია მას. ასე იყო მაგ. საფრანგეთის დიდი რევოლუციის დროს, როცა როიალისტები და კლერიკალები განდევნილ იქნენ ქვეყნიდან და როცა ისინი მეზობელ სახელმწიფოებში ეძებდნენ თავშესაფარს; იმავე საფრანგეთში რესტავრაციამ და შემდეგ, 1848 წ. გერმანიაში რევოლუციის დამარცხებამ ბევრი რევოლუციონერი აიძულეს საზღვარგარეთ გაქცევას.

პარიზის კომუნის დამარცხებას 1871 წ. ასეთივე შედეგი მოჰყვა: კომუნარები, რომელნიც დაჭერას და სიკვდილს გადაურჩნენ, საზღვარგარეთ გაიქცენ—უმთავრესათ შვეიცარიაში, ბელგიაში და ინგლისში.

მტარვალური რეჟიმი რუსეთის მეფეებისა ხომ შეუწყვეტლათ ჰქმნიდა პოლიტიკურ ემიგრაციას მთელ ერთი საუკუნის განმავლობაში და 1905 წ. რევოლუციის დამარცხების შემდეგ ის განდა მასიური—გამარჯვებულ კონტრ-რევოლუციისაგან დევნილინი ათეული ათასობით მოედვენ ევროპის სხვადასხვა ქვეყნებს.

ემიგრანტთა მდგომარეობა ყოველთვის და ყოველგან გაჭირვებული იყო. მოწყვეტილი თავის საყვარელ ქვეყანას, თავიანთ მშობლებს, მოძმე-ნათესავებს და ტოლ-ამხანაგებს, ისინი განიცდიდნენ საშინელ მორალურ ტანჯვას. იტანჯებოდნენ ისინი ფიზიკურათაც სამუშაოს უქონლობის გამო, მუდამ ლუკმა პურის ძებნით. მართალია მათ ეხმარებოდნენ ესა თუ ის პოლიტიკური პარტია თუ კერძო პირები, მარა ეს დახმარება ვერ ქმნიდა მათ უზრუნველყოფას. სამაგიეროთ იურიდიული მხრით ისინი არ განიცდიდნენ დაბრკოლებებს, რადგან ყველა განათლებული ქვეყნების კონსტიტუცია იძლეოდა საჭირო გარანტიას პოლიტიკურ ლტოლვილთათვის «თავშესაფარ უფლებასა»; საკმარისი იყო მხოლოდ პირადობის გამოჩვენება, დამტკიცება იმისი, რომ ის თავისი ქვეყნიდან გამოქცეული იყო როგორც პოლიტიკური დამნაშავე, რის შემდეგ ის ლებულობდა მთავრობისაგან ნებართვას თავისუფლად ცხოვრებისა. ამიტომ წინათ არასოდეს საკითხი ლტოლვილთა ინტერნაციონალურ მფარველობისა არ დასმულა.

ეს საკითხი პირველათ ისტორიაში წამოიჭრა მთელი თავისი სიმწვავეით რუსეთში ბოლშევიკების გამეფების შემდეგ, ვინაიდან ასეთ ფართო ფარგლებში და ასე სისტემატიურათ დევნა ყველა იმათი, ვინაც «კაზნიონურათ» არ აზროვნობს, არასოდეს არც ერთ ქვეყანაში არ ყოფილა. ჰუმანარიტად შეიძლება ითქვას, რომ ამ მხრით, როგორც სხვა ბევრ სისაძაგლეშიაც, ბოლშევიკებმა გადააქარბეს ყველა ქვეყნის და ყველა დროის დესპოტებს, რომელნიც ოდესმე არსებულან. ამიტომ თუ წინათ ლტოლვილთა საერთო რიცხვი ათეულ ათასს არას დროს არ აღემატებოდა, დღეს ასი ათასობით ითვლება (7 წლის წინ

შეკრებილი ცნობებით ის თითქმის სამ მილიონს უდრიდა).

ასეთმა გაუგონარმა რიცხვმა ემიგრაციისა შექმნა ევროპაში ერთნაირი საშიშროება. მთავრობებმა იწყეს პრაქტიკულათ-შეკვეცვა საუკონოებით არსებულ «თავშესაფარ უფლებასა». ბოლშევიკების ვერავლამა საქციელმა—ყველა ქვეყნებში მალულ აგენტების ყოლამ, პროპაგანდა-აგიტაციის წარმოებამ, კომუნისტური პარტიების და გაზეთების სუფსიდიამ და სხ.—აიძულა ისინი ომის დროს შემოღებული პასპორტის და ვიზის სისტემა დაეკანონებიათ და ასე უცხოელთა შემომვების შესახებ დიდი სიფრთხილე გამოეჩინათ. ემიგრანტი არა სასურველი ხდებოდა კიდევ არსებული ეკონომიური კრიზისის გამოც.

ამ ნაირათ ლტოლვილთა მდგომარეობა ყოველად უნუგეშო შეიქნა. ვის უნდა ეზრუნა მათზე? წითელი ჯვრების ნივთიერი დახმარება წვეთი იყო ზღვაში და იურიდიული მხრით მათ არავითარი კომპეტენცია არ ქონდათ.

ასეთ პირობებში ერთა ლიგის საბჭომ გადასწყვიტა ჩარევა საქმეში. მან მოიწვია 1921 წ. ზაფხულში ამ საკითხის გასარჩება ინტერნაციონალური კონფერენცია ქენევაში. ამ კონფერენციამ მიიღო უმთავრესი დადგენილება: შექმნა ლტოლვილთა კომისარიატის, დაწესება მათთვის სპეციალური პასპორტის («ნანსენის პასპორტი») და გამოითხოვა ერთა ლიგისგან განსაზღვრულ თანხის გადადებისა ლტოლვილთათვის სესხის-სახით დახმარების გასაწევათ, როცა მათ ერთი ქვეყნიდან მეორეში გადასვლა დასჯირდებოდათ სამუშაოს საშოვნელად.

უნდა შევნიშნოთ, რომ სწორეთ ამ დროს ჩვენი ქვეყანა ახალი დაპყრობილი იყო და სტამბოლში ქართული ლტოლვილები გაჭირვებაში იმყოფებოდნენ. საჭირო იყო მათი სხვა ქვეყნებში გადაყვანა. მაშ დახმარება ჩვენც გვესაჭიროებოდა. ამიტომ ჩვენმა მთავრობამ ინსტრუქცია მისცა თავის წარმომადგენელს ქენევაში, წამდგარიყო ხსენებულ კონფერენციაზე, წარედგინა ქართველ ლტოლვილების შესახებ მოხსენება და მოეთხოვა დახმარება. იგი ასეც მოიქცა. ხოლო საკითხის დაახლოვებით გაცნობის შემდეგ მან ვერ სცნო მიზანშეწონილათ, ისეთი დახმარება მიეღო ჩვენი ლტოლვილთათვის, რომელიც მათ, ქართველ მებრძოლთ, უსამშობლოთა კათოვორიასთან გაასწორებდა და ესეც იმ დროს, როცა ქართული დროშა თავისუფლათ ფრიალებს საქართველოს საელჩოზე და როცა ამ უკანასკნელს სრული უფლება აქვს, თავისი პასპორტი გასცეს.

ამ ნაირათ ქართველ ლტოლვილების ინტერნაციონალურ მფარველობის ქვეშ დაყენება არ გამოდგა ჩვენი საქმისათვის სასარგებლო, იურიდიული მხრით ეს მათ არც ესაჭიროებოდათ, ნივთიერად ბევრს არას სძენდა, პოლიტიკურათ კი უხერხულ მდგომარეობაში აყენებდა. ჩვენ უარი ვსთქვიით. მარა გაჭირვება დიდი

იყო, ვსაქირობედით დახმარებას ისეთი გზით, რომელიც იურიდიულ მხარეს ჩვენთვის სავალდებულოთ არ გახდოდა. ამ მიზნის მისაღწევად ჩვენმა წარმომადგენელმა მიმართა 1921 წ. სექტემბრის დასაწყისში ერთა ლიგის საბჭოს. მისმა თავჯდომარემ ბ. ველინგტონჯემ ურჩია მას, პირადათ მოლაპარაკებოდა ყოფილ თავმჯდომარეს ბრაზილიის წარმომადგენელს ბ. დაკუნას. რომელსაც მინდობილი ქონდა საბჭოში რუსეთის ლტოლვილებზე მოხსენების გაკეთება. მას ეს მოხსენება არ გაუკეთებია, სხვას გადაანდო. მარა კერძოთ ქართველ ლტოლვილებზე კი ილაპარაკა. მართლაც ერთა ლიგის საბჭოს 3 სექტემბრის სხდომის ოქმში აღნიშნულია:

«ბ. დაკუნამ მიაქცია ყურადღება 400 ქართველ ლტოლვილებზე, რომელნიც ამ უამად საშინელ გაქვივრებას განიცდიან კონსტანტინოპოლში, საქართველოს რესპუბლიკის წარმომადგენელმა სთხოვა მას ერთა ლიგის დახმარება. —საბჭო ადგენს, რომ ქართველ ლტოლვილების საკითხი ეცნობება (ევალდება) დიდ კომისარს». ეს კომისარი, როგორც ვიცით, ნანსენია...

საკითხის ობიექტიური მთავრობა მოითხოვს, აქვე აღნიშნულ იქნას შემდეგი; ბოლშევიკების დროს ემიგრაციის პირობები წინანდელზე უარესია. წინათ რუსეთის ემიგრაციათა ევროპაში ყველა კლასები თანაუგრძნობდნენ და თვით რეაქციონერ პარტიებშიც კი ვერ იპოვნიდით ისეთ სინდისზე ხელაღებულს, რომელსაც ემიგრანტის წინააღმდეგ გალაშქრება უზნეობათ არ ჩაეთვალა. მათი ინტერესების დაცვა მუშათა პარტიებს სავალდებულოთ მიაჩნდათ, თვე არ გავიდოდა ისე, რომ ამ პარტიების უდიდეს ბელადებს, მაგ. ბებელს, ჟორესს, ვიქტორ ადლერს და სხ. რამდენიმე საქმე არ ჰქონოდათ ემიგრანტებისა და მედგრათ არ ჩარეულიყვენ მათ სასარგებლოთ. სულ სხვაა დღეს. ბოლშევიკებმა არეულობა შეიტანეს მუშათა კლასში. შექმნეს კომუნისტურ პარტიები—ეს ისტორიაში გაუგონარი ერთი მთავრობის დაქირავებულთა გროვა—რომელნიც წაესევინ ყველა იმას, ვისზედაც მათი პატრონი მოსკოვი მიუთითებს. სოციალისტური პარტიები კი ვერ იჩენენ ემიგრანტების გამოსარჩლებადი ძველებურ ენერგიას.

ერთა ლიგის ყრილობამ 1921 წ. დაამტკიცა ზემოხსენებულ კონფერენციის რეზოლუციები შესახებ კომისარიატის და პასპორტის დაარსებისა, მარა კომისარიატს კრედიტი კი ბევრათ ნაკლები გაუხსნა, ვინემ კონფერენცია თხოულობდა. ყოველ შემთხვევაში ეს კრედიტის სიმცირე არ იყო მიზეზი იმის, რომ კომისარიატმა ვერ შესძლო ემიგრანტების სამუშაოზე მოწყობა, ვინაიდან როცა საბჭომ 1924 წ. ის შრომის ინტერნაც. ბიუროს დაუქვემდებარა, კრედიტი არც მაშინ მიუმატებია. აქ მოხდა მხოლოდ მოქმედების კოორდინაცია, შრომის ინტ. ბიუროს ავტორიტეტის და გამეოცილების სარგებლობა, რის წყალობით მართლაც ემიგრაციის დიდ უმრავლესობას სამუშაო მიეცა და ამ მხრით მწვავე კრიზისიც შენელდა. ოთხი წლის შემდეგ, შრომის ბიურომ თავის მისია შესრულებულათ იცნო, სწორეთ

ეს აზრი გაატარა მისმა დირექტორმა ალბერტ ტომამ თავის მოხსენებაში ლიგის მეცხრე ყრილობისადმი. ის დასძენდა, რომ კომისარიატს დაბრუნებოდა მთელი თავისი უფლება და პასუხისმგებლობა ლტოლვილებზე ზრუნვისა. ამავე დროს რჩევას იძლეოდა კომისარიატის ავტორიტეტის გასამაგრებლათ დაარსებულყოფილ მუდმივი მრჩეველი კომისია. ეს მოხსენება ალბერტ ტომასი სავსებით მიღებულ იქნა ყრილობის მიერ. მარა ამავე დროს ყრილობამ დაადგინა მოწვევა სპეციალური კონფერენციისა ამ წლის მაისის 16, რომლის მიზანი იქნებოდა შესწავლა იმის, თუ როგორ შეიძლება რადიკალური გადაჭრა ლტოლვილთა საკითხის და მაშასადამე კომისარიატის გაუქმებისა.

ჯერ კიდევ ამ დადგენილების ადრე ზოგიერთ მთავრობებმა გამოიჩინეს ტენდენცია კომისარიატის მოხსნისა—ზოგმა საბჭოსადმი მტრული განწყობილების მოტივით, ზოგმაც მეგობრულის. ამ მდგომარეობამ დიდი შიში და მღელვარება გამოიწვია ემიგრანტთა წრეებში. ყრილობის დადგენილების შემდეგ ამ შიშს კიდევ მეტი რეალური, საფუძველი მიეცა. კომისარიატს თავისი გაუქმება არ სურდა და შეუდგა დასაყრდნობის ძებნას თვით ემიგრანტთა ორგანიზაციებში. მან მოიწვია წარსულ თებერვალში დაინტერესებულ ემიგრანტთა და მათ დამხმარე ორგანიზაციათა წარმომადგენლების კონფერენცია, რომლის უმთავრეს მიზნათ დასახულ იქნა ლტოლვილთა იურიდიული სტატუსის შემუშავება-დაცვა.

საყურადღებოა ის, რომ ბოლშევიკები აქაც ეჩხირებოდნენ. ამისთვის საკმარისია დაეასახელოთ ერთი მაგალითი. 15 თებერვლის კონფერენციაზე თითქმის ყველა სომხურ ორგანიზაციების სახელით ლაპარაკობდა ერთი ვინემ მინოსიანცი, რომლის წარმოდგენილი მოხსენება გუნდოთუკს უკმბოდა საბჭოთა ხელისუფებას. გამოდიოდა, თითქოს ამ რევიმის ფასი არაფერი არსებობდეს დედამიწაზე და თითქოს მთელი სომხობა ბ. მინოსიანცი იხატებოდეს, რომლის პრობლემის რადიკალურათ გადაჭრა მხოლოდ კავკასიაში ჩასახლებით შეიძლება, რასაც ხელს უწყობს საბჭოთა მთავრობათ—ამბობს ის—მარა ამისათვის «საჭირთა ყოველივე პოლიტიკა განდევნილი იყოს ჩვენი სამოქმედო სფეროდან». კონფერენციამ შეიმუშავა მთელი რიგი მოთხოვნილებათა, რომელთა შორის უმთავრესი ადგილი ეჭირა კომისარიატის საჭიროების დასაბუთებას. ამ კრებამ საჭიროთ დაინახა აერჩია დელეგაცია თავისი მოთხოვნილებების მისში ლიგის მიერ მოწვეულ კონფერენციის წინაშე დასაცველათ. არჩევნების დროს ფრიად დამახასიათებელი ინციდენტი მოხთა. დასახელებულ იქნა სხვათა შორის სომხის ცნობილი საზოგადო მოღვაწე ბ. ხატისიანი. ამ კანდიტატის წინააღმდეგ გაილაშქრა ბ. მინოსიანცმა. როცა მოტივი მოსთხოვეს, განაცხადა, რომ ბ. ხატისიანის წარმოდგენილი მემორანდუმი და თვით მისი პიროვნებაც პოლიტიკური, რაც დაუშვებლათ უნდა ჩათვალოსო. მას ადვილათ დაუმტკიცეს, რომ მისი მემორანდუმიც პოლიტიკური იყო. მიუხედავათ ამისა, როცა თავმჯდომარე ბ. ჯონსონი შეეკითხა, მამ ვინაა თქვენი კანდიდატიო,





ბ. მინოსიანცმა თავისი თავი დაასახელა. კრებამ ბ. ხატისიანი აირჩია.

16-18 მაისს შემდგარ კონფერენციაზე გამოიჩინა, რომ ლტოლვილების საკითხის რადიკალურად გადასაჭრელად წამოყენებულ ორ საშუალებებისთვის—ნატურალიზაციისთვის, ე. ი. იმ ქვეყნის ქვეშევრდომობის მიღებისათვის, სადაც იმყოფებიან, ან მათი რუსეთში დაბრუნებისათვის—არ არსებობს აუცილებელი საჭირო პირობები. პირველი შემთხვევა ყველა ქვეყნების კომსტიტუციის შეცვლას მოითხოვს, მეორე—რუსეთში წყობილებისას. ასეთ პირობებში ვერც ერთმა მთავრობამ ვერ მიიღო თავის თავზე ემიგრაციის შავ-ბედის პასუხიმგებლობა, რომ წინადადება გაეკეთებინა კომისარიატის მოხსნისა; ყველას სინდისის წინაშე იდგა საკითხი: რა ეშველება ამდენ ხალხს?» ეს ისარგებლა ნანსენმა და მოითხოვა კომისარიატის დატოვება. მთავრობების წარმომადგენლებმა იცნეს აუცილებლობა კომისარიატისა ამ

ყამად, მარა მოითხოვედნენ, რომ კომისარიატს ყველაფერი დაემთავრებინა მოკლე დროში და შემდეგ გაუქმებულიყო. ბოლოს და ბოლოს კომისარიატი დასტოვეს ათი წლით.

ამ ნაირათ ლტოლვილთა პრობლემა ძირითადად გადაჭრული პასუხი ვერ ჰპოვა, ის მხოლოდ გადადებულია ათი წლის ვადით, რომლის განმავლობაში კომისარიატი ერთა ლიგის სეკრეტარიატის დროებითი ნაწილი იქნება და მის ზედამხედველობის ქვეშ იმუშავებს. გარდა ამისა გაიმართება ყოველ წლიური კრება მთავრობათა კომისიისა იმავე ტიპის, რომელიც მაისში შეიკრიბა. ყველაფერი ეს ჯერ რეზოლიუციებია, მარა ექვი არაა, მომავალი ყრილობა ერთა ლიგისა რეზოლიუციებს დაამტკიცებს.

ს. შავციცილი.

ქენევა, ივლისი. 1929 წ.

„კ ა ვ კ ა ს ი ო ნ ი“

(პირველი და მეორე წიგნი)

ქართველ სტუდენტთა ეროვნულ გაერთიანებას განუზრახავს ერთი ნაკლის შევსება: «ხელოვნებისა და მეცნიერების კრებულის» გამოცემა, და მისი რედაქტორობაც თვითონ უკისრნია. მიზანი, რომელსაც კრებული ისახავს, არის ორნაირი: ა) ლტოლვილ ქართველ მწერალთა შემოკრება და ბ) მათი თავისუფალი სიტყვით «უფროსების და უმცროსების» დარაზმვა «ქართული კულტურის დროშის ქვეშ, რომელზედაც სისხლითაა აღბეჭდილი უდრეკი ბრძოლის მტკიცე სურვილი—თავისუფლება!»

მე განგებ ამოვიწერე უკანასკნელი სიტყვები, რომ დაეანახო მკითხველს. თუმცა ცოტა უხეშათ, სადაა სიმძიმის ცენტრი. სამშობლოს თავისუფლება, მის «სამსხვერპლზე გაერთიანებული რიგებით მისვლა»—აი პოლიტიკური მისწრაფება კრებულისა. და ეს გარემოება, რა თქმა უნდა, უშლის მას როგორც ხელოვნებისა, ისე მეცნიერებისათვის სამსახურს!

მართლაც, ძალიან ცოტას ხვდებით თქვენ, კრებულის ორსავე წიგნში, მხატვრულს. თუ არა თარგმანი რაბინდრანათ ტაგორიდან და გიუ დე მოპასანიდან, თქვენ შეგრჩებათ ხელში ორიოდვე ესკიზი ქართული ავტორებისა და ლექსები, ეს კი უხვათ, პატრიოტულ პანგებზე. რამდენიმე ნახატიც პირველ წიგნში და სადა ყდა ორივე წიგნისა—აი სულ.

რაც შეეხება მეცნიერულს, კიდევ უფრო ნაკლებ წააწყდებით იქ, ან უკეთ—სულაც არ წააწყდებით. შეიძლება ასეთად ითვლება ექ. თაყაიშვილის «სომხით-საორბელოს ძეგლების წარწერები»? ჩვენი წარსულის შესასწავლათ ამ ნედლ მასალას მნიშვნელობა აქვს, თავის თავთ ცხადია, მაგრამ რამდენათ უკეთესი იქნებოდა მის მაგიერ იმავე პ.-ც. პროფესორის ერთ-ერთი, პარიზში წაკითხული, ლექცია მოეთავსებოდათ, საქართველოს ისტორიიდან!

გამოდის, მე საყვედურებით ვავსებ ახალგაზდა რედაქტორებს და გამომცემლებს... აზრადაც არ მომსვლია! მათ ერთი წამოიწყეს და მეორე კი გამოუვიდათ: ხელოვნებისა და მეცნიერების მაგიერ კრიტიკა და პუბლიცისტიკა! განა ეს მათი ბრალია? არა, პირიქით, ღირსებაცაა. დიდი ღირსება, რომ მზგავს არაჩვეულებრივ პირობებში, მათ «გაბედეს», ბაზგაორც თვითონ ამბობენ, ასეთი გეგმით გამოსვლა.

მაგრამ ჯერ ისევ მიმოხილვას შევუდგები იმისას, რაც არის; ხოლო რაც არ არის, ამაზე ბოლოს ვიტყვი ორიოდვე სიტყვას.

დავიწყებ სალიტერატურო კრიტიკიდან. სახეში მყავს მ. წულუკიძე და ვლ. ბაქრაძე. დიდის ინტერესით წაიკითხავთ პირველის: გალაქტიონ ტაბიძის პოეზია ჩვენი ქვეყნის დაცემამდე, და მეორის: მიხეილ ჯავახიშვილის «ჯაყოს ხიზნებში». მ. წულუკიძე ფაქიზის ხელით და მხურვალე თანაგრძნობით გადმოგვიშლის გ. ტაბიძის ნაღვლიან შემოქმედებას და ხაზს უსვამს იმ გარემოებას, რომ ეს პოეტი გამოუნაკლისია ჩვენს მწერლობაში, თვით ნიკ. ბარათაშვილისაგანაც კი განირჩევა, თავისი უიმედობით და მართლობით. ჩვენი კრიტიკოსი შიშს გამოსთქვამს მხოლოდ, ვაი თუ დღევანდელმა ჯოჯოხეთურმა პირობებმა მას ფერი აცვლევინოსო, და ამაშიაც მკითხველი კვერს დაუტრავს მას, სამწუხაროთ. ვლ. ბაქრაძე რამდენიმე მოსწრებულს ხანით გვითვალისწინებს თეიმურაზის და მარგოს არაბუნებრივობას «ჯაყოს ხიზნებში», და სამაგიეროდ დასრულებულ ტიპად სთვლის თვით ჯაყოს და იმავე დროს—სიმბოლოდ დღევანდელ ბოლშევიკურ არამზადობისა. კრიტიკოსს უკვირს კიდევ, როგორ გამოვიდა ჯავახიშვილის ხელიდან ასეთი შესანიშნავი ტიპიო. მართლაც, ჯავახიშვილი არ არის «სპეტაკი» ხელოვანი, მისი ენაც, ცოტა არ იყოს, «გარყვნილია» ადგილ-

ადგილ, მაგრამ ნიჭი უთუოთ აქვს მას, რომანისტია, ცხადია.

ვლ. ბაქრაძეს სხვა არაფერი წაუკითხავს მისი, ეს კი სამწუხაროა. და აქ მინდა ვახსენო მისი, ვლ. ბაქრაძის, პირველი შენიშვნები ლიტერატ. და თეატრ. კრიტიკაზე კომუნისტ. პრესაში. ბაქრაძე გვაცნობს ორ კომუნისტი კრიტიკოსის—დუდუჩიას და ჩიქოვანის—კამათს ერთ სათეატრო პიესის «ანზორი»-ს შესახებ და თავის მსჯავრს სდებს. ის ბევრ სამართლიან რამეს ამბობს, უეჭველათ, მიუთითებს კომუნისტ. კრიტიკის დამახასიათებელ მხარეზე—მაბეზღრობაზე, მაგრამ არ მალავს, რომ თვით საკამათო საგანი «ანზორი» მას თვალითაც არ უნახავს, არ წაუკითხავს! როგორ მოგწონთ ეს? მე არ მინდა შევჩერდე ამაზე და მხოლოდ ვურჩევდი «უმცროსებს», რომ ზოგ შემთხვევაში, დაასეთში განსაკუთრებით, «უფროსებს» ნუ მოეკრძალებიან!

მინდა შევჩერდე ი. მანუკაძეს «ქართულ ლიტერატურაზე», მაგრამ ვიშოვებ კარგი არაფერი ვსთქვა. გარნა წერილი სიმპატიურია, მაგრამ სათაური არ იფარება მისი შინაარსით. იქ ქართულ ლიტერატურაზე კი არაა ლაპარაკი, არამედ იმაზე, თუ რა ცუდი პირობები შეუქმნია ჩვენში მტერს და რა განსაცდელში ჩაუვდია ჩვენი ერის სულიერი განვითარება. ავტორი იწყებს, მართალია. ილია და აკაკიდან, მაგრამ თითქმის იმავე გვერდზედ გადადის პოლიტიკურ მსჯელობაზედ, და ასე ბოლომდის. ის აღნიშნავს, რომ ჩვენი ეროვნული შეგნება არ იყო «წრეს გადასული, ულტრანაციონალისტური», მაგრამ თითქო ერიდება ხელი წაკრას უკანასკნელ. ომის წინ, «ნილილისტურ» ხანას სწორეთ ამ სფეროში, რამაც კიდევ მეტი გვავნო...

სიამოვნებით წაიკითხავთ მეორე ახალგაზდის მ. ბილანიშვილის: «ხელოვნების პრინციპები და ნიკო ფიროსმანიშვილი». სწორეთ გახარებთ ამ ახალგაზდათა დარბაისური კილო და მჩატე სტილი, გამოსთქვამენ აზრს ლამაზთ და მკაფიოთ, ვერ ამჩნევთ მასვიადებას... მხოლოდ ერთი კაც: სამ და ნახევარ გვერდზედ მოუსურვებია ჩვენს ავტორს ასეთი დიდი და ორი თემის გაშუქება. მკითხველს აინტერესებს პრინციპებიც და ფიროსმანიშვილიც, ხოლო ავტორის კონსპექტური გადმოცემით ვერ ეცნობა ხეირიანათ ვერც ერთსა და ვერც მეორეს! სამაგიეროთ ის დასტკბება, სამწუხაროთ, უფრო მტრების მიერ აღმოჩენილი, ნიკო ფიროსმანიშვილის ორი ნახატი.

გადავალ პუბლიცისტიკაზე. თავდაპირველათ მე მინდა შევეხრა ა. შათირიშვილის ფრიად საყურადღებო წერილს: «ერის რაობა». აქ თქვენ ერთგვარ სერიოზულ ცდას დაინახავთ ერის მეცნიერულათ განსაზღვრისა, როგორც ერთ-ერთი რთული პრობლემისა. ემყარება რა სხვადასხვა მეცნიერთა აზრებს, ახალგაზდა ავტორი ასკვნის: «ერი ისეთი საზოგადოებრივი ერთეულია, რომლის შესატყვისი კოლექტიური ცნობიერება ერთმანეთს უკავშირებს ერთ მთლიან ტერიტორიაზე გაშლილ ყველა ძირითად მცხოვრებთ, და რომელიც იმით განსხვავდება სახელმწიფოსაგან, რომ მისი კოლექტიური ცნობიერების ელემენტები ისე მჭიდროდ არიან შეზდილი

თვითეულ პიროვნების ფსიქიკასთან, რომ ისინი თანდაყოლილი ინსტინქტების ანუ ბუნებრივ მიდრეკილებათა შთაბეჭდილებას სტოვებენ». განსაზღვრა ცოტათი მძიმეა, უეჭველათ, მაგრამ არსებითათ მართალი. ავტორი ძველი მეტაფიზიკურ დებულებასაც თავს აღწევს, ვითომ ერის კოლექტიური ცნობიერება ან კიდევ სული ჩვენს გარეშე არსებობდეს. არა, ის არსებობს იმდენათ, რამდენათ თვითეული ჩვენგანი, ერთი ერის ელემენტები, განვიცდით. ვსცნობთ, გამოვყოფთ მას თვით ჩვენს გარეშე. ერი განირჩევა სახელმწიფოსაგან—პირველი ორგანიზული და მეორე კი მექანიკური შეერთებაა—, მაგრამ ერის განსახიერება, მისი მეობა ან კიდევ მისი ნებისყოფის რეალობაში გადასვლა შეიძლება მხოლოდ სახელმწიფოს სახით, აქედან ერი და სახელმწიფო ხშირათ ტყუბდებიან. ძნელი ხდება მათი ერთიმეორისაგან გარჩევა. სასურველი იქნებოდა, რომ ა. შათირიშვილს, მისი მდიდარი ერთეულის მიხედვით, ამ საინტერესო ზოგადი ცნის შემდეგ, დალაგებოთ გეცნო, მომავალში, მკითხველისათვის სხვადასხვა თეორიები ერის შესახებ, რაიცა, სხვათა შორის, მასაც საშუალებას მისცემდა უფრო ნათლათ ჩამოეყალიბებია თავისი კონცეპცია ამავე საგანზე.

თეორიიდან მ. ხუნდაძე კონკრეტულათ გადადის საქართველოს საკითხზე საერთაშორისო სამართლის თვალსაზრისით. კითხვა მეტის-მეტათ საინტერესოა და თანაც პრაქტიკული ჩვენი ყოველდღიურ მუშაობაში. წერილი სქემატიურათ აცნობს მკითხველს საკითხის მდგომარეობას ამ მომენტში და ასკვნის, რომ საქართველოს უცხო ძალთა მიერ ოკუპაცია არ არყვეს მის იურიდიულ უფლებებს, რომელიც მხოლოდ შებოჭილია და არა გამქრალი საერთაშორისო სამართლის მიხედვით. ავტორი ერთგვარ გამოწკიცისად სახავს საქართველოს შემთხვევას თანამედროვე ავტორიტეტთა წარმოდგენით, გვპირდება ერთგვარ ანალიზსაც ამ მხრივ. მაგრამ, სამწუხაროთ, ნაკლებ დაინახავთ მას. მასალაც, რომელიც უსარგებლანია ავტორს, არ არის მთლათ უნაკლებლათ გაშუქებული, ზოგი მნიშვნელოვანი მომენტი არ არის სულაც ნახსენები. ერთი სიტყვით, შთაბეჭდილება ისეთია, თითქო ავტორი ჩქარობს, უნდა სთქვას ბევრი და ცოტასაც ვერ ასწრებს... მაშინ როდესაც მას აქვს, უეჭველათ, უნარიც და საკმაო მომზადება, რომ მოგვეცეს უფრო საფუძვლიანი და ამომწურავი ანალიზი. ეს კი ძალიან საჭიროა.

ვისაც საშუალება არ ჰქონია კომუნისტურ პრესიდან ვაცნობოდა საქართველოს მოსახლეობას, უკანასკნელი აღწერის მიხედვით, მას ედ. პაპავა სასარგებლო ცნობებს აწვდის ამ საგანზე. ფრიად საგულისხმიერო შედარებითი ცხრილი მოაქვს მას, სხ. შორ., ჩვენი დედა-ქალაქის მოსახლეობის ცვლილებაზე: მაშინ როდესაც 1897 წ. ქართველებს ეჭირათ თფილისში მესამე ადგილი (26,4 პროც.), ხოლო რუსებს პირველი (29,8 პრ.) და სომხებს მეორე (29,5);— 1926 წ. ქართველებს პირველი ადგილი დაუჭირათ (38,2), სომხებს მეორე (34,1) და რუსებს კი მესამე (16,3). მართლ ეს ერთი ცხრილი მოწმობს, რომ ქარ-



თველი ერი, მიუხედავად წარმოუდგენელ ძნელი პირობებისა, ახალ პოზიციებს იკავებს.

შალვა ამირეჯიბის დაუმთავრებელი წერილი: «მარიამ დედოფალი» საუკეთესო ნიმუშია ნიჟერ ავტორის თავისებურ ყანრისა. მკითხველი ეცნობა ბაგრატიონთა დინასტიის დრამატიულ დასასრულს. მეფე ერეკლეს იმედების არგამართლებას საიმპერიო რუსეთის მიერ საქართველოს მიმართ, შულსა და უთანხმოებას მეფეთა ოჯახში და სხ. გზადაგზა ბევრ ზამსინტერესოს ვაიგებს მკითხველი მაშინდელ ჩვეულება-ადათებზე მეფის კარზედ, მათი დროს ტარებას, დარბაზობას, სახელმწიფო საქმეების გაძღვლას. ავტორს განსაკუთრებული უნარი აქვს მოთხრობითი სახე მისცეს დიდ ისტორიულ ამბების აღწერას და მკითხველიც თავს ვერ ართმევს, სანამ ბოლომდის არ ჩაიკითხავს. უდავოა, მას აქვს თავისი ტენდენცია, ერთგვარი რომანტიზმი უძველესი დინასტიისადმი, მაგრამ ეს არ უშლის გაბედულათ აღიაროს მისი ნაკლებიც, როგორც ერთ-ერთი მიზეზი დამხობისა.

მისაბაძია გ. ნოზაძის ოპტიმიზმი, ის გვაცნობს ახალ ქალაქბაღების გაშენებას დასავლეთში და ამ თავითვე ითვალისწინებს მზგავსი მშენებლობის გაჩაღებას განთავისუფლებულ სამშობლოში. სწორეთ ასე: ჩვენი ახალგაზდა ემიგრაციის მთავარი დანიშნულება იმაში უნდა მდგომარეობდეს, რომ შეისწავლოს სხვადასხვა დარგი ტექნიკური პროგრესისა, რათა გამოიყენოს იგი ჩვენი ქვეყნის საკეთილდღეოდ.

კაჟის: «ევრაზიელობა» სწორეთ დროული თემა კრებულის მკითხველთათვის. სამწუხაროთ, უნდა აღინიშნოს, რომ ჩვენი ახალგაზდა, გამოდის რათავის პოლიტიკურ-ეროვნულ რწმენიდან, ნაკლებ ეტანება რუსულ მწერლობას და აქედან პოლიტიკურ ცვალებადობას რუსთა სვადასხვა წრეებში. ეს კი არაა მიზანშეწონილი თუ გინდ ვიწრო ნაციონალისტური თვალსაზრისით: მტერს კიდევ უფრო მეტი შეისწავლა სუირია, ვინემ მოყვარეს! კაჟი გამოცდილის ხელით გვაცნობს რუსეთის ერთ პოლიტიკურ მიმდინარეობას: ევრაზიელობას, რომელსაც ამა თუ იმ სახით უთუოთ აქვს მომავალი ხვალინდელ რუსეთში, და დღესაც ხომ ბოლშევიზმი მისი საძირკველია. ყველაზე საინტერესო ისაა, რომ ამ მიმდინარეობის მესვეურნი ევრაზიაში გეოგრაფიულათ გულისხმობენ არა მარტო ეთნოგრაფიულ რუსეთს, არამედ საბჭოთა მთელს საბრძანებელს. ე. ი. არარუსებსაც! იმედით უნდა ვიქონიოთ, რომ კაჟი ამ მხარეს ახალ მიმდინარეობისა უფრო საფუძვლიანათ გავაცნობს და თან მის დაფასებაც გადავცავ.

ვერიკო სოსანი გვაცნობს ძველ ქართველ მწერლებს, გვისახელებს მათ ნაწერებსაც თითო-ოროლა შენიშვნებით და თავიდანვე გვაფრთხილებს: «განმეორებისათვის». არა, თავს ნუ ვიტყუებთ, განმეორება კი არა, არ ვიცით, უნდა ბეჯითათ შევისწავლოთ! და ამიტომ, თუ ის შეასრულებს დანაპირს და თვითუელ მწერალს, უძველეს მწერალს, საფუძვლიანათ გავაცნობს, «პრემიასა» სანაქებოს მიიღებს—ქართულ მადლობას.

მამ ასე. თუ ვახსენებთ ორ ბიბლიოგრაფიულ შენიშვნას: აკაკი ასათიანის «ქართული მწერლობა უცხოეთში» და მანინი-ვარდანის ნაფთის ლიტერატურაზე. თითქო შოვათავებთ მიმოხილვას. ვამბობ «თითქო», რადგან დანარჩენი კრებულთა სიტყვა-კაზმულ და მხატვრულ განყოფილებას შეადგენს, და აქედან უმნიშვნელოვანესი უცხო ენებიდანაა გადმოღებული. რა თქმა უნდა, გვერდს ვერ აუხვევთ სტ. კასრაძის: «საზღვარზე გადასვლა»-ს და დაუმთავრებელს «სანაპირო ქალაქი», რომელიც უთუოდ გვამცნევენ ავტორის ნიჭს, და არაჩვეულებრივ დაკვირვებას. ლექსებიც ურიგო არაა, ჩემდათავად მე ვახსენებდი მ. დადიანის «დილა»-ს სანიმუშოთ. თინათინ ჯავარიანის: «ფრანგული ლიტერატურის ისტორიიდან» სასარგებლოა მხოლოდ კიდევ უფრო სასარგებლო იქნებოდა, რომ ავტორს შეენელებია ნაბიჯი, ნაწილ-ნაწილათ და ვრცლათ გაცნო მკითხველისათვის საფრანგეთის ძველი ლიტერატურის მთავარი ძეგლები. სანიმუშოთ დაიწყოს თუ გინდ «ტრისტან და იზოლტა»-თი—რა მადლიანი თემა!

მკითხველი დამეთანხმება, რომ მიმოხილული ორი წიგნი «კავკასიონი»-სა საქმაო საბუთს იძლევა მიჯულოცოთ ქართველ სტუდენტთა ეროვნულ გაერთიანებას უკვე ჩატარებულ მუშაობისათვის. ეს დასაწყისია, და უნდა ითქვას, კარგი დასაწყისი, რომელიც შემდეგ და შემდეგ უთუოთ გაიხარებს და დამწიფებულ ნაყოფს გამოიღებს. ამისათვის საქმარისია შეადაროთ ერთმანეთს პირველი და მეორე წიგნი: მეორე სჯობნის პირველს, როგორც შინაარსით, ისე გარეგნობით. განა საეჭვოა, რომ მესამე და მეათე ნამდვილი გამარჯვება იქნება?

და რაში უნდა გამოიხატოს ეს გამარჯვება? პირვანდელ გეგმის დაკვირვებისაში, კრებულის მართლა «ხელოვნებისა და მეცნიერების» ორგანოდ გადაქცევაში. მხოლოდ ნუ იფიქრებენ ახალგაზდა გამომცემლები და რედაქტორები, რომ ისინი შესძლებენ პოლიტიკის გაძევებას—კარებიდან, ფანჯრიდან შემოუვლოთ! ერთი კია; და ამაში ისინი სრულიად მართალნი არიან: კრებულის კარები ღია უნდა დარჩეს ყველა ქართველისთვის, ვისაც ნიჭი და უნარი შესწევს, განურჩევლათ მიდრეკილებათა, რა თქმა უნდა, ჩვენი ეროვნულ დროშის ქვეშ.

რაც შეიძლება მეტი ორიგინალური ნაწარმოები ხელოვნებიდან და მეცნიერებიდან, რაც შეიძლება ღრმა სულიერი განცდა და მეტი გონებრივი ვარჯიში... ხოლო დანაკლისი საუკეთესო ნიმუშების უცხო ენებიდან ვადმოლებით უნდა შევისვას. ამ მხრივ ჩვენი მწერლობის სიღარიბე გამაწითლებელია! მე ხაზგასმით მინდა აღვნიშნო კრებულის თაღსანათ კარგი გემოვნება, როცა ისინი რ. ტაგორით იწყებენ...

და რისი მოთავსება მოასწრეს ამ შესანიშნავ ფილოსოფოს-პოეტისა, ნებას გვაძლევს გავკადნიერდეთ და ერთი შთაბეჭდილება არ დაუშალო მკითხველს: ავტორები პატრიოტულ ლამაზ ფრაზების გადაპარბებულ სიყვარულს იჩენენ! იდეალებიც თითქო წარსულში ეგულებათ! რასაკვირველია, სამშობლოს ერ-



დგულობაში, მისთვის მტლათ დადებამი არავინ უნდა გგობნიდეს; წარსულის ზედმიწევნით ცოდნაც, მისი აწმყოთან შეუწყვეტელობის აღდგენა უდიდესი მოვალეობაა ჩვენი, მაგრამ ნურვინ იტყვის, რომ მარტო ამით ფონს გავალთ. უნდა ვინებდებოდეთ წინ, უნდა მოუკვლელის წყურვილით დავეწაფოთ ცოდნას, უსაზღვრო ცოდნას, და მაშინ დავინახავთ, რომ ადამიანი, ადამიანობა არის ერის, ეროვნების პრიმატი, და ორივე ერთად კაცობრიობის მიუცილებელი და დამამშვენებელი უჯრედები.

დასასრულ, სახელწოდება «კავკასიონი» დროულია, მშვენიერი! მაგრამ ამასაც ხომ გამართლება ექვირება, და ეს კი ვერ დავინახეთ ორივე წიგნის

გასწრივ! თუ არა ვარდნის «ნაფთი»! კავკასიის ერთა ურთიერთობა, თვითულის შესწავლა, მათი საერთო კრედო, მათი სიმდიდრე და ადგილი საერთაშორისო ეკონომიკაში—აი დაუშრეტელი წყარო კვლევადებისა, შესწავლისა, ვიტყვოდი, სიყვარულისა. დიხს, გარდა საქართველოსა, არის საერთო სამშობლოც—კავკასია. ერთი პოლიტუკური პლატფორმაც ხომ გამოფენილია: კავკასიის კონფედერაცია, თქვენი აზრი, ახალგაზდებო?!

ერთი მოწოდებაც: წაიკითხეთ გულდასმით პირველ წიგნში თაოსნთა: «ქართველ საზოგადოებას», და იმედი მაქვს, მთელის არსებით დაეხმარებით «კავკასიონს».

გუშავი.

**ბარბიუსი ლალატობს ჩაბრუთა საქმის**

სახელის მოხვეჭა არა კმარა ადამიანისთვის, რომ თავი დაახწიოს შეცდომებს, გასაკიცხს საქციელს და თვით საძაგლობასაც.

ბოლშევიზმმა, რომლის დანიშნულება თითქმის დაბნელება და ყველაფრის მოწამლევა იყო, რასაც კი ხელს შეახებს, დამლუპველი გავლენა იქონია «ცეცხლის» ავტორზე. მან გამოიყვანა სამოქმედოთ ეს შესანიშნავი ნიჟიერი მწერალი, რომელმაც ადვილად წარმოიდგინა, რომ საქმარისია მწერლობა, რათა პოლიტიკური მოღვაწე გახდეს.

ბოლშევიზმს უნდა სახელი გაუტეხოს სოციალიზმს, მის წინამდევ სამკედრო-სასიცოცხლო ბრძოლას აწარმოებს, რის დანახვა და გაგება არ უნდათ მარტო «უმანკოებს», და მეოცნებეთა ეკსტაზით განაგრძობენ «ერთობის» ქადაგებას.

თავის წიგნში «აი რა უყვეს საქართველოს» (Voici ce qu'on fait de la Géorgie) ბარბიუსი იმდენად დაქვეითდა, რომ ქებას შეასხამს საქართველოს ჯალათებს და ასე ბოროტად იყენებს თავის ნიჟს.

მაგრამ სად იყო ბარბიუსი 1914 წლამდის, როცა ჩვენ აღტაცებით ტაშს ვუკრავდით სოციალისტების წარმოებულ ბრძოლას რუსეთში მეფის რეჟიმის წინამდევ და როცა ყველა საოპოზიციო მოძრაობის სათავეში იდგნენ ქართველები? ქართველები არ იყვნენ, რომ თავი გამოიჩინეს სახელმწიფო სათათბიროში მჭერმეტყველობით, გამბედაობით, სიმტკიცით? ქართველი მებრძოლი არ იყვნენ, რომ არ უშინდებოდენ ციხეს, გადასახლებას, დატუსაღებას და სიკვდილს, მაშინ როდესაც ბარბიუსი სწერდა მხოლოდ საეჭვო «ჯოჯოხეთს»?

და აი ეს ადამიანი, სახელოვანი რომ გახდა—ჩვენ პატივს ვსცემთ მის სახელს—დღეს ბოლშევიკებს ვმსახურება მათ ბნელ საქმეებისთვის. დღეს ის სტამბავს მოსკოვის ფულით სურათებიან ყურნალს, სადაც საინტერესო წერილებს შორის გააპარებს ხოლმე კომუნისტურ საწამლავეს; მოქმედობს სწორედ

ისე, როგორც ამას მოითხოვს იეზუიტების ნაცადი მეთოდი. ოდესაში ფაშისტს ბალბოს მსურვალე ოვაციებს უმართავენ, ბარბიუსი კი თავმჯდომარეობს საეჭვო თვისების ანტიფაშისტურ კონგრესს, რომლის ერთადერთი მიზანი ისაა, რომ თავს დაესხას სოციალისტებს. ის თანახმაა დაეხმაროს მოსკოვის ბატონებს—განიწმინდონ იმ შეურაცხყოფისაგან, რომელიც მიაყენა მათ თელმა ქვეყანამ საქართველოს სამხედრო ოკუპაციის გამო, ის ამართლებს და აქებს საქართველოს დამონებას, როგორც ზოგიერთმა გერმანელმა ისტორიკოსმა შეაქო 1915 წ. ბელგიის ოკუპაცია. ის არ კმაყოფილდება მით, რომ გავსაროს დღევანდელი ჩვენი ქართველი ამხანაგები, ცთილობს სახელი გაუტეხოს 1914 წ. წინანდელ ქართველ მებრძოლთაც.

ბარბიუსო, როცა თქვენ ასე იქცევით, ელაქუტებით ძლიერებს და ცილსა სწამებთ მკვდრებსა და დევნილებს. თქვენ ყოველს პატივისცემას უკარგავთ თქვენს შრამას. ამიერიოვან ყოველთვის, როცა თქვენ შეეცდებით გამოეხარჩლოთ ჩაბრუთა საქმეს და გააკიცხოთ ფაშისტურ მთავრობათა ძალადობა, გამოვა ვინმე და მოგაგონებთ, რომ თქვენ დასწერეთ «აი რა უყვეს საქართველოს», სადაც გაბედეთ ბრალი დასდოთ ადამიანებს, თავისუფლებისათვის რომ იბრძოდნენ და იტანდენ განსაცდელს, რომლის მსგავსი თქვენ არ გინახავთ და არ განვიცდიათ.

როგორ ბედავთ, თქვენ ბარბიუსო, დააბრალოთ ჩვენს ქართველ ამხანაგებს, რომ 1914 წ. ისინი მიესალმენ იმპერიალისტურ ომს? ნუ თუ არ იცით, თქვენ ცილისმწამებელ ბოლშევიკების მოსამსახურე, რომ ჩხვიძემ მთელი პასუხისივებლობა ომისათვის დააკისრა მეფის მთავრობას და სოციალისტური ჯგუფის სახელით, რომლის თავმჯდომარე ის იყო, ხმა არ მისცა საომარ ხარჯებს?

ბარბიუსის ასეთი სიმჩატე, რომელსაც იჩენს ბრალდებების წამოყენების დროს ქართველ სოციალისტების წინამდევ 1914 წლამდის, ყოველ ღირსებას უკარგავს მის წიგნს, მას ნდობა აღარა აქვს—როგორ შეგიძლიათ ენდოთ, როცა საზიზღრობა ასე ამკარაა.

\*) წერილი E. P. Graber-ისა, შვეიცარიის ცნობილ პოლიტ. მოღვაწის დაიბეჭდა გაზეთ La Sentinelle-ში (№. 170).

ვინ არ იცის, რომ ჩვენმა ქართველმა ამხანაგებმა მიწები ჩამოართვეს მსხვილ მემამულეებს და მრავალი ასი ათასი ჰექტარი გადასცეს წვრილ გლეხობას. და ბარბიუსი, რომელმაც გაიარა საქართველო უზურპატორების და ჯალათების თანხლებით და რუსის ჯარების მფარველობის ქვეშ, სწერს: «სოციალისტურმა მთავრობამ მიწები დაუტოვა მსხვილ მესაკუთრეებს, რადგან უკანასკნელნი მას მხარს უჭერდნო».

ბარბიუსი ურცხვად იმეორებს ტფილისის ჩიკის წევრის სიტყვებს: «ჩვენ არავის დავსჯით გაუსამართლებლად; ბრალდებულს ვაძლევთ ყოველ გარანტიას, კანონის მოთხოვნილებებს ყოველთვის ვასრულებთო». როდესაც ბარბიუსი ასე საქართველოს ოკუპანტ ბოლშევიკების ლაქიად გამოდის. ის იწვევს ჩვენში სიბრალულს, კიდევ მეტს—სირცხვილს. თქვენ ბარბიუსო, თქვენ, რომელმაც აღწერეთ ბალკანეთის სატუსაღობის საშინელებანი, თქვენ სწერთ ამ სამარცხინო სიტყვებს: «დიდი ალიაქოთი ასტეხეს აჯანყებამდის დატუსაღებულ მძევლების ჯუღელის, ხომერიკის, ჩიკივიშვილის დახვრეტის გამო. მაგრამ აქ სიტყვას მძევალს მნიშვნელობა არა აქვს. ეს პირები მხოლოდ მკვლელები და ჯალათები იყვნენ, რომელთაც მრავალი დანაშაულობა ჩაიდინეს».

ასე ლაპარაკობთ, ბარბიუსო, თქვენ პოლიციელების ენით, ყველა ქვეყნის მოძალადეთა, მტარვალების ენით? გრცხვენოდეთ, ბარბიუსო, რომელიც ვერასოდეს მოიწონებთ თავს, როგორც ხომერიკი და ჩიკივიშვილი იმით, რომ 1917 წ. რევოლუციამ გაათავისუფლათ ციმბირიდან, სადაც ისინი გადასახლებული იყვნენ იმისთვის, რომ ებრძოდნენ მეფის მტარვალობას.

სირცხვილი თქვენ, რომელიც საზიზღარ ცილს სწამებთ ამ მკვდრებს, რათა ემსახუროთ დღევანდელ მტარვალებს.

### ს ა ქ ა რ ტ ვ ე ლ ო ს ს ა კ ი თ ი ს ი

გაზეთი Journal de Genève მეთაურს უძღვნის იმ კანონ-პროექტს, რომელიც ამას წინად შეტანილი იყო შეერთებულ შტატების სენატში წარმომადგენლის დანიშვნისათვის კავკასიის რესპუბლიკების ერთნულ მთავრობებთან. «საბჭოებისათვის ყველაზე მწვავე დამტკინეული ადგილი საქართველოა», სწერს გაზეთი: დაიწყებენ თუ არა ბოლშევიკები ცრემლით ლაპარაკს ხელშეკრულებათა პატივისცემაზე, მაშინვე ფაქტები აღიმართებიან მათ წინააღმდეგ, ვინაიდან საკუთარის ნებით იცნეს საქართველოს სრული დამოუკიდებლობა და არ გაუვლია დიდხანს და ძალით დაესწნენ თავს. საბჭოებს ეუბნებიან, თუ გულწრფელნი ხართ, ყოვლის უწინარეს გაანთავისუფლეთ რესპუბლიკა. რომელიც იძულებით დაიკავეთ თქვენი ჯარების შემწეობითო. ბოლშევიკების მოქმედება კავკასიაში არის სრული უარყოფა იმ პრინციპებისა, რომლებსაც თვითონვე აცხადებენ, და ამიტომ, რომ ბოლშევიკების მეგობრები ყოველთვის

ნერვიულობენ, როდესაც ვინმე საქართველოს სახელს ახსენებს».

შემდეგ გაზეთს მოყავს ოფიციალური ცნობა ზემოხსენებული კანონ-პროექტის შესახებ და ამბობს: «აქ აღნუსხულია მოკლედ არსება საქართველოს საკითხისა. საქართველო არაა ახალი მცნება, ხელოვნურად შექმნილი ადამიანების ტვინით: იგია სახელმწიფო, რომელმაც თავის წარსულში თავის გმირულ ბრძოლებით დამოუკიდებლობისათვის დაამტკიცა თავის ცხოველობა და ღირსია მარადიულობისა. საგულისხმიერა ამერიკელების მხრივ, რომელთა სახელმწიფოს წარმოშობას რელიგიური საფუძველი ჰქონდა, იმის აღნიშვნა. რომ ქრისტიანობა საქართველოში მეოთხე საუკუნიდან დამყარდა.

საქართველო, უძველესი სახელმწიფო. შეეგუა დღევანდელს მოთხოვნილებებს: დამოუკიდებლობის აღდგენის დღიდან მოაწყო დემოკრატიული სახელმწიფო დამფუძნებელი კრებით, რომელიც წესიერად აირჩია ხალხმა. ეს ყველაფერი ეთანხმება ამერიკელების იდეებს.

საქართველო იცნო სახელმწიფოების დიდმა ნაწილმა. რატომ არ უნდა იცნოს თავის მხრით ამერიკის დიდმა რესპუბლიკამ? საქართველო ძალმომრეობით, სიშტებით დაიკავეს ბოლშევიკებმა, რასაკვირველია ეს გარემოება ვერ შეაჩერებდა ამერიკელებს დღეს, როცა ისინი მთელს ქვეყანას უცხადებენ კელოვის პაკტს და ჰგმობენ ომს. ვერა, და სწორედ სადი საერთაშორისო მორალის გამოხმატველია კანონ პროექტი, როდესაც ამბობს: შეერთებული შტატების მთავრობამ უნდა დაჰგმოს რუსეთის მოქმედება და გამოუცხადოს თავისი სიმპატია კავკასიის რესპუბლიკათა ერებსო»...

### 29 აგვისტო

აგვისტოს 29 და მაისის 26! ერთი მეორეზეა გადაჭედლი, ერთის გახსენება მეორეს იწვევს, ერთი უმეორით წარმოუდგენელია! ერთია თავისუფლება, მეორე ბრძოლა ამ თავისუფლებისათვის. ვინც არ იბრძვის თავისუფლებისათვის, ის ვერასოდეს მოიპოვებს მას, ის არცაა ღირსი თავისუფლების. თავისუფლება მაშინაა მხოლოდ სინამდვილე, როცა არის შეგნება მისი დიადობის და აუცილებლობის, და არის შეგნება მისი დაცვის საჭიროების, მისთვის თავისდადებისა და მსხვერპლის გაწირვისა.

26 მაისს ქართველობამ გამოაცხადა, რომ იგი კვლავ ერია, რომ მისი ისტორია კვლავ გრძელდება, და აღადგინა თავისი დამოუკიდებლობა. აგვისტოს 29-ს ქართველმა ერმა ერთის ნებით გამოაცხადა, რომ თავის თავისუფლების შელახვას არასოდეს შეურიგდება და იბრძოლებს, იბრძოლებს მარად მისი სრულ აღდგენამდის.

მოვიგონოთ აგვისტო და მიიხედოთ 26 მაისისკენ. ბრძოლა გრძელდება, ბრძოლა 26 მაისისათვის.

### კომპარტიის მე-6 ყრილობა

«თუმცა არ ვარგა ყრილობაზე ასეთი დიდი დეფექტების შესახებ ლაპარაკი, მაგრამ მაინც უნდა ვილაპარაკოთ»...

მ. კახიანი.

ცნობილი ზუსტურად—კახიანი ისევ ამტყვევდება. ამ გრამოფონის ფირფიტამ ბევრი რამ ახირობული სთქვა და ბევრი ისეთიც, რაც დაქირავებული ოქროპირის ბაგეს არ უნდა წამოცდენოდა: საბჭოთა მექანიკური ადამიანის მოდუნება, მისი სულიერი ალტყინების უკუქცევა, სალი აზრის ლიკვიდაცია. თვითონ კახიანი არ იყო შეიძლება ურიგო კაცი, რომ საბჭოთა მათრობელა პურს თავიდან არ გაებრუებია, რომ კომპარტია მას ყოველის მცოდნეობის ყალბი შარავანდდით არ მოსავდეს, არ აამბულემდეს, როგორც ყველა კომუნისტს, სიმართლის თქმისა მასაც ეშინია, როგორც მშინაარს ინსტიტუტურად ეშინია ბნელი ოთახის დახვარვის, თუგინდ იქ არც ერთი კუდიანი არ ეგულვებოდეს.

რის გაგება შეიძლება მისი მოხსენებიდან? შევეხოთ ზოგიერთ პუნქტებს.

1. კონტრაქტაცია არის ძალდატანებაზე აგებული ეკონომიური გაყვლეფის ახალი ხერხი, რომელიც სოფლის მეურნეობას კატასტროფის შუაგულში ადგებს, უკარგავს აზრს ახალი მატერიალური დოვლათის შექმნას, ანადგურებს გლეხს. როგორც მეურნეს და აყენებს მას მთავრობის მოჯამაგირის ილოტურ მდგომარეობაში.

კომპარტიის მე-6 ყრილობაზე გამოირკვა, რომ მაზრის პატრონებს ძლიერ უჭირთ ამ მაკიაველური პოლიტიკიდან ნაშობი ღონისძიების გამოყენება. რადგან გლეხს, როგორც ტროცკი ამბობდა თავისი ყაენობის დროს, ჰქონია «ნე ტოლკო პრედრახსუდოკ, ნო ი რახსუდოკ». სოც. სოუსის სახით მორთმეულმა სახაზინო ფასების განრიგებამ, რომლის ძალით მთავრობის ოთხი გაზნარული კრამიტი ერთ ფუთ სიმინდათ ღირს და მთავრობის ერთი ფუთი თოკი გლეხის ერთ ფუთ პარკად,—აი ამ მგლურ სამართალმა წაშალა სრულიად ქვეყნის აღორძინების პერსპექტივა და ჩასტეხა მთავრობასა და ხალხს შორის გადებული ისედაც მერყევი ხიდი. კახიანს ვერ აუხსნია გლეხის «ჯიუტობა» და ცოფიანის დორბლსა ჰყრის: როგორ თუ ღიხაურის (გურია) ქალთა კრებამ მთავრობის ფასების დაწუნება ვაბედა და, ჰოი სავალალო საკვირველებზე. ამ ოქმს კომუნისტებიც ხელს აწერენ. კახიანის რეცეპტი თურმე «უნდა შევანებო გლეხობას, თუ რამდენად ხელსაყრელია მეურნეობის ეს ფორმა». ვისთვისაა სასარგებლო, ამაზე კახიანი სდუმს. მერე ვინ შევანებო გლეხობას, რომ მოსკოვის სამი ალაბი დამპალი ჩითი და საქართველოს ერთი ფუთი აბრეშუმის პარკი ერთი და იმავე ღირებულებისა? თუ დავუმატებთ, რომ სოფლის ნაწარმოები მთავრობას ნისიად მიაქვს და «ანადგებს» გვიან, იმასაც დაცემული ფულით ან დაბრაკული საქონლით, მივხვდებით, თუ რატომ ვერ ბედავს კახიანი ღიხაურის ამბავს კარგად ჩასლიოს და

მხოლოდ საკითხის გამასხარავებით კმაყოფილდება.

2. საბჭოთა ეროვნული პოლიტიკის საფუძველი ეროვნული აზრის უქონლობაა. აი რა გამოირკვა ყრილობაზე.

თენგიზ ქლენტი: ტფილისის პარტიულ უჯრედებში «მოხსენებები არ კეთდება ადვილობრივ ენაზე. არ ლაპარაკობენ არც ქართულად, არც სომხურად. ლაპარაკობენ მხოლოდ რუსულად. ვინც რუსულად ლაპარაკობს, ის აქტიურ მუშაკად ითვლება, ხოლო ვინც ეს ენა არ იცის, მას პასიურ ელემენტად სთვლიან».

კვირკველია: «ქართული ენა ტფილისში ისპობა და შორს არ არის ის დრო, როცა ის სავსებით აკრძალული იქნება».

კახიანის პასუხი: «თუ ქართველმა კარგად იცის რუსული ენა, ის მით უფრო უკეთესად იმუშავებს საბჭოთა ხელისუფლების განსამტკიცებლად საქართველოში».

ცხადია, ურუსეთოდ და ურუსულენოთ ჩვენში ბოლშევიზმი როგორ იხეირებს! თან ბატონის ენა თუ იცი, უკეთესად მიელაქუცები.

3. იდეოლოგიური ფორმები: სტუდენტების და პროფესორის «წმენდა»; გამოცდები პარტიული მიდგომით, სასკოლო ჩეკა. ქართულ უნივერსიტეტს ჩამოგლიჯეს ორი ფაკულტეტი, და პოლიტეხნიკუმში გათქვიფეს. ეხლა კახიანს მოეპოება «ნამდვილი ინტერნაციონალური სკოლა, სადაც რუსებს, ქართველებს და სომხებს ასწავლიან რუსულ და სომხურ ენებზე». ამრიგად საქართველოს უმაღლეს სკოლაში ქართული ენა არ მოიკითხვოთ, შოვინიზმა.

პროლეტარ მწერლებს მუზეუმის გუნდი დაფრთხობია. ვინ შეუქმნია ამ მშვენიერ არსებათ, ან ვინ დაუწყო ხალისი და გრძობა ამ ტრედიაკოვსკის მოწაფეობის უღირს მწერლებს? ესენი დიდხანს უმღეროდნენ საბჭოთა წითელ ყვავილს, მაგრამ დანახეს, რომ ის ყვავილი ხელოვნურად გამოჭრილი სადეკორაციო ყვავილია და ცოტა არ იყოს გული დაუღონდათ. ვინ იცის, იქნებ მათ თავის დროზე მხოლოდ ლექსი გაყიდეს და არა ინტუიცია, გარეგნული ალერსი და არა გული. ან იქნებ უფრო სწორი ის იყოს, რომ მათში თავმოყვარეობამ გაიღვიძა, სული ლეშს ასცილდა და ამაღლდა.

ვინმე ლორთქიფანიძე, მაგალითად, აშკარად ამბობს, რომ აღარ ძალუძს «ბიბლიის ენით ვალუქსოს ცაკის დადგენილება, ან კომპარტიის დირექტივების დაიწყოს უშნოდ გადამღერება».

აი ნაფოფი მეორე კალმის, შედარებით უფრო მკრეფის და დინამიურის:

«და ამ ბრძოლაში შორს გაექანე, სამშობლო მხარეც, სისხლიან დალით, შენ ხარ უკვდავი ბრძოლის ქვეყანა, სამყაროს გულზე—გაშლილი ბალი. და მე ვოცნებობ ამ გაშლილ ბალში უნდა ვკონავდეთ ქარხნების კონებს, გვქონდეს სიცოცხლის გაქანებაში სხვა ხალხთა სწორი ძალი და ღონე.»



ჩვენ ამ ბრძოლაში არ გვეყავს მეტოქე,  
და ყველა აქ ვართ დღეს მოგროვილი...  
ქართული სისხლი თვით მზის ფერია  
და ამ სისხლითვე დაგვიწვრია  
დროშაზე: ქება მოქართველი».

კახიანს თმა ყალყზე უდგება, როცა პოეტი უკვ-  
დავ ბრძოლაზე ლაპარაკობს, რადგან კახიანის აზრით  
საქართველო ვაგბენიერებულია და უკუნიითი უკუ-  
ნისამდე საბრძოლველი აღარაფერი აქვს. პოეტს  
აღარ აკმაყოფილებს საბჭოთა რუხი ცხოვრების და-  
მყარებული ატმოსფერო, ჩამორჩენილობა, კარჩაკე-  
ტილობა. მას ენატრება თავისი ქვეყნისათვის «სხვა  
ხალხთა სწორი ძალი და ღონე», ე. ი. დღევანდელი  
არტანუჯისაგან თავის დაღწევა და კულტურულ ერ-  
თა ოჯახში შესვლა. პოეტი მოითხოვს დინამიურო-  
ბას; ის ვერ შეეგუა რუსული ყაზარმის მლაშე ჰაერს  
და მოსწყურდა თავისი ქვეყნის «ქება მოქართველი».  
მისი ორიგინალობა საიდუმლო კაეშანის გაზიარებ-  
ში ზოგჯერ მართლაც გასაოცარია. ის ამბობს, რომ  
მას სურს მივიდეს პირუტყვთან და მასთან იყოს მა-  
სავით გულუკეთილ და უწყინარ არსებად, რადგან ის  
დაიღალა...

დიან, დაიღალა ამდენი სისხლის ცქერით; ის  
დღევანდელს ლეგალურ ადამიანში ხედავს მხოლოდ  
კბილთამყრჯენ არსებას, სადისტს, ქვეძრომიას და  
ქარაფშუტას. ეს დალილი «პოეტი» იონა ვაკელია  
(9 ივლისის «კომუნისტი»).

4. აქარის შესახებ ყრილობაზე სულ არ  
უნდოდათ ლაპარაკი, რათა თავისი სიგლაზე არ გა-  
მოეჩინათ. მაგრამ კახიანს ენამ უყვილა და მერე და-  
მაღვა როგორღა შეიძლება. პირველად ყოვლისა,  
ბოლშევიკებმა ერთი დიდი უსამართლობა კიდევ  
ჩაიდინეს აქარლების მიმართ: მათ უსინდისოდ მია-  
ფუჩჩეს აქარის მამაცური წინააღმდეგობა და თვით  
აჯანყებას რაღაც სოფლური გაუგებრობა უწოდეს.  
მაგრამ ვინ არ იცის, რომ აქარაში იყო ნამდვილი  
აჯანყება, ნამდვილი თავდადება მუხანათ მტრის მო-  
საგერიებლად. საერთოდ მუსულმანი ქართველი ფა-  
ქიზი და დიდსულოვანია, და როცა ბრძოლა კომსო-  
მოლი მის რწმენას და თავმოყვარეობას აბუჩად იგ-  
დებს, რა გასაკვირია, რომ აქარლებმა არ დაინდვეს  
ეს წითელი ნიანგები და კუდიან ქვა ასროლიეს.  
ბოლშევიკური ყრილობა შეეცადა, მაგრამ აჯან-  
ყების მიზეზი მაინც ვერ მიაფუჩჩა. ეს მიზეზი იყო  
«ადმინისტრაციული ძალდატანება, რელიგიასთან  
ბრძოლა, სასულიერო სკოლების დახურვა, მორწმუ-  
ნეთა რელიგიური გრძობის შელახვა» და სხვა მრავ-  
ალი.

აი რა სიტყვები მიხალა ცხვირპირში კომუნის-  
ტებს აქარელმა გუგუნავამ: «მთავრობა თვითონ არის  
დამნაშავე; მან ვერ გაითვალისწინა, რომ ასე ადვილი  
არ არის მუსლიმანს აიძულან თავისი სარწმუნოების  
დავიწყება, ჩადრი და მედრესი—ეს მუსლიმანის სა-  
ხელი და სინიდისია»-ო.

სასწორი რომ მოიტანო და ბოლშევიკების მხა-  
რებზე იალბუზი დასდო, სასწორი მაინც აქარლების-  
კენ გადაიწევა, რადგან სიმართლე და ზნეობა ამათ  
მხარეზეა.

მეორე აჯანყებული ამბობს, რომ მთავრობა  
მის ინტიმურ საკითხში ერეოდა და მთელს ოჯახს  
დანგრევით უქაღალდა.

«მე ამას წინად ცოლი შევიერთე... მერე ჩემი ცო-  
ლი გაიწვიეს მანარში. შემდეგ კიდევ ბათომში. ბო-  
ლოს და ბოლოს ვისთვის შევიერთე ცოლი, ჩემთვის  
თუ თქვენთვისა? მე ამის გამო მზად ვარ წყალში გა-  
დავარდო».

როცა ბოლშევიკურ ყრილობას აქარელის ასე-  
თი სასოწარკვეთილებით აღსავსე ჩვენება გააცნეს,  
ყრილობამ ნაღვლისა და მონანიების მაგივრად ერ-  
თი მადიანათ გადიხარხარა (ა. წ. 6 ივლისის «კომუ-  
ნისტი», გვ. 2), რადგან აქარელის უმწეო მდგომარე-  
ობა ბოლშევიკებში სიცილის მეტს არაფერს იწვევს.  
ამის შემდეგ ბოლშევიკების ნიანგის ცრემლებს რა-  
ღა დაეკრება.

ია.

### რას სწამენ ბოლშევიკებში

ვენის «N. Fr. presse» აღნიშნავს დიდი გერმა-  
ნელი მრეწველის ოტტო დოიჩის წერილს, რომელიც  
წინად თავგამოდებით იცავდა ეკონომიურ თანამშ-  
რომლობას საბჭოებთან. დოიჩი გასულ განაფხულ-  
ზე იყო რუსეთში და ამბობს, რომ ბოლშევიკების  
რესპუბლიკა გაკოტრებამდეა მისულიო. რაკი ხორ-  
ბალი ველარ გამოაქვს უცხოეთში, საბჭოთა მთავ-  
რობას აღარ მოეპოვება საშუალება შეინახოს თავი-  
სი ინდუსტრია და სახლვარგარეთიდან გამოიწვროს  
საჭირო იარაღები და მანქანები. ქვეყნის წარმოება  
შემცირდა და აგრეწოდებული ხუთწლიანი გეგმები  
უბრალო ხრიკია უცხოელების მოსატყუებლათ და  
მათგან კრედიტის მისაღებად. გახეთი ფიქრობს, რომ  
სულ ახლო მომავალში შეუძლებელი გახდება ყო-  
ველგვარი ეკონომიური ურთიერთობა რუსეთთან.

ბოლშევიკურ განვითარებაში მრავლად იბეჭდება  
წერილები რედაქციის მიმართ, სადაც ავტორები  
მწარედ ჩივიან საბჭოთა ინდუსტრიის ნაწარმოების  
სრული უვარგისობის გამო. «შეუძლებელია, სწერს  
ერთი კორესპონდენტი «კრასნაია გაზ.» მიღება სრუ-  
ლი ტანსაცმელისა ერთი და იმავე ნაჭერისაგან, ერ-  
თი და იმავე ტანისათვის. ადამიანი კიდევ შეურიგ-  
დება იმ გარემოებას, რომ პიჯაკი ერთი მატერიისა-  
განაა და შალვარი მეორესაგან. მაგრამ ხშირად ერთი  
შალვარი შეკერილია სხვა და სხვა მატერიისაგან.  
ისეც მოხდება ხოლმე, რომ ნაყიდს პიჯაკს მხოლოდ  
ერთი სახელო აქვს. როცა მყიდველი ამ გარემოებას  
მიაქცევს ყურადღებას, მას ეუბნებიან: «მოქალაქე,  
წაიღე, რასაც გაძლევენ, თორემ სულ ცალიერი დარ-  
ჩებიო». მეორე კომუნისტურ განვითარებაში «კომსო. პრა-  
ვდაში» ვკითხულობთ: «ცამეტი ფეხსაცმელი ვიყი-  
დე სახელმწიფოს მალაჩიაში, არც ერთს არ გაუძლია  
რამდენიმე წუთის შემდეგ, როგორც კი გავიარე. ყვე-  
ლა დაიშალა, დაირღვა. მოვიტხოვე გამოცვლა. მა-  
ლაჩიის გამგემ უპროტესტოთ გამომიცვალა, ხოლო  
მითხრა: თვითონ შენ აირჩიე, რადგან ყველა ფეხსა-  
ცმელი ერთი ღირსების არისო.»



გაზეთები გადმოგვცემენ ასეთ საშინელ ამბავს: საბჭოთა რესპუბლიკის ექიმთა კონგრესზე მოსკოვში დიდი კამათი გაიმართა იმ საკითხის გარშემო— საბჭოთა ექიმმა უნდა აღმოუჩინოს საექიმო დახმარება თავის «კლასობრივ მტერს», ე. ი. არა მუშათა კლასის წევრს, თუ არაა. კრების კომუნისტმა წევრებმა წინადადება შეიტანეს, რომ აკრძალული ყოფილიყო გადაჭრით საბჭოთა ექიმისათვის დახმარების აღმოჩენა იმ პირთათვის, რომლებიც არ ეკუთვნიან პროლეტარიატს, ვინაიდან კლასთა ბრძოლაში ყოველი საშუალება დასაშვებია და ავადმყოფობას შეუძლია კიდევ დაეხმაროს მთავრობას ბურჟუაზიის მოსასპობად. კონგრესმა პრინციპიალურად მოიწონა ეს აზრი. ხოლო რადგან შესაძლებელია ბურჟუაზიის ბავშვებისაგან ავადმყოფობა პროლეტარიატის ბავშვებს გადაედვას, ამიტომ ექიმებს ნება აქვთ უწამლონ ბურჟუებს გადამდებ ავადმყოფობის დროს.

ვინმე ჯგესე რაიტი, ამერიკელი მრეწველი, ეს-ლა ხან დაბრუნდა რუსეთიდან და ასე გადმოგვცემს თავის შთაბეჭდილებებს: «მე გავეგზნარე საბჭოთა რუსეთში ამერიკელ ტურისტებთან ერთად. გემით მოვედი სტოკჰოლმიდან პეტერბურგში. პირველი ფენის გადადგისთანავე თვალში მეცა მცხოვრებთა სალატაკე. ვერასოდეს წარმოვიდგენდი, თუ ადამიანებს შეეძლოთ ასეთ სიბინძურეში ცხოვრება, როგორც ვნახე პეტერბურგში. მერე ვიყავი მოსკოვში, კიევში, სევასტოპოლში, იალტაში და დავრწმუნდი, რომ ყოველგან სრული გაქვირება და სასოწარკვეთილებაა. ჩვენ დაეტოვებოდა რუსეთი ოთხი დღით აღ-რე, ვიდრე განზრახული გვქონდა. არსად არ მინახავს ამდენი სალდათი და შეიარაღებული სამოქალაქო პირი. ჩვენ მოგვიყენეს ოფიციალური გიდები, რომელთაც დავვათვალე რებიეს მუშათა დასასვენებელი სახლები და სკოლები. გზაში დანგრეული სახლები შეგვხვდა, გიდებს ამაზე რომ მიუთითეთ, არა გვიპასუხეს რა. ბოლშევიკები ტურისტებს უჩვენებენ, რაც თვითონ უნდათ».

### ქ ა ლ ა მ რ თ ო ბ ა შ ი ა

(წერილი სპარსეთიდან)

ვინ არ იცის, რომ საბჭოთა ხელისუფლების არსებობა იმ მომავლად ავადმყოფს წააგავს, რომელსაც საკუთარი სალი სულის მაგივრად ხელფეხურად შემზადებულ ჰავას უბერავენ; თვით სათავეში მდგომი კომისრებმაც ეს კარგათ იციან, მხოლოდ არც ჩვენ და არც იმათ არ იციან, თუ ვინ შეცვლის მათ, ვინ იქნება იმათი მოადგილენი. ერთი კი ექვს გარეშეა. იქნებიან რუსები, ისიც ვიცით, რომ იმათი მეგვიდრენი იქნებიან სოციალისტები, თუ კონსერვატორები, ყველანი ჩვენზე ბატონობას მოისურვებენ, ვინაიდან დროთა სვლაში ისინი შეეჩვიენ ბატონობა-ბრძანებლობას, რომლის სიტკბობის თავის მინებება ად-

ვილი საქმე არ არის. მეორეთ ისიც ვიცით, რომ თუ ვერ გაუთანასწორდით რეალურ ძალაში, მათთან მეგობრობა თავის მოტყუილება იქნება.

ვიცით, რომ ძალა ერთობაშია და ამ შეერთებაზე უნდა ვიზრუნოთ. ამ ერთობის საპირობებს სხვა დახარული ერებიც ჰგონობენ. არ იქნება გადამეტებული, თუ ვიტყვით, რომ თურქისთან თავის მოწინავე ავანგარდად ქართველებსა სთვლის და მომავალ კავკასიის კონფედერაციასთან დაახლოვებას ოცნებობს.

მართალია, გულზე ხელ-დაკრევილნი არ ვსხედვართ. მაგრამ მაინც და მაინც დიდს არაფერს ვაკეთებთ, თუ მხედველობაში არ მივიღებთ ყურნალ «პრომეთეს». მართალია, ეს ყურნალი დიდ როლს თამაშობს.—მაგრამ არა კავკასია-უკრაინა-თურქისთანის მდაბიო ხალხში-მასსაში, არამედ ევროპის სახელმწიფოებში და მალალ საზოგადოებებში. მაშასადამე საპირობა დაარსება ისეთი გამოცემისა, რომელიც ფართე მასის მოთხოვნილებას დააკმაყოფილებს, კულტურულად და პოლიტიკურად ხალხს მოაზნადებს და მომავალ თავისუფლებას შეანარჩუნებინებს.

ამ საქმეში მონაწილეობა უნდა მიიღონ ზემო აღნიშნული ერების წარმომადგენლებმა ჩვენი თაონობა-ინიციატივით. კავკასია თურქისთანით ზურგ გამაგრებული მყიდროთ უნდა შეუჟავშირდეს უკრაინას და სხვებს. ამ საქმეს დაგვიანება არ უნდა...

გვრისხელი.

### ბანბნუხის წიგნის წინამძღვე.

ჩვენ, სპარსეთში მყოფი ქართველები პროტესტს უცხადებთ ჰანრი ბარბიუსს იმ ყალბი წიგნის შედგენისათვის, რომელიც მას გამოუყვია ფრანგულ ენაზე ამ სათაურით: «აი რა უყვეს საქართველოს», და ვსახავთ მას ყალბ მწერლათ და ბოლშევიკების შესყიდულ აგენტად. იმედი გვაქვს, რომ ჩვენი შეგნებული საზოგადოება შესაფერ პასუხს გასცემს მას. რომ სხვა მისებრ ბოლშევიკების მოსყიდულმა მწერლებმა ვერ გაბედონ სინამდვილის გადაჩქმალვა და ჩვენი ერის აბუჩათ აგდება.

(ოცდა სამი კაცის ხელ მოწერილი სპაროტესტო ოქმი ინახება ჩემთან).

გვრისხელი.

### მ ე მ ო წ ი ო უ ლ ე ბ ა .

საქ. სოც. დემ. მუშ. პარტ. საზღვარგარეთელ ბიურომ მიიღო პოლიტ. გადასახლებულთათვის:

პ ო ლ ო ნ ე თ ი . ვ . ქ ა რ ც ი ვ ა დ ი ს ა გ ა ნ 100 ფ რ ა ნ კ ი .

Rédaction et Administration.

M. J. GOBETCHIA

7, rue de Ponthieu, 7. Paris.